

ASO GAFUA, 13 NOVEMA 2017

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amatalia nei Taualumaga ma Galuega a le Fono Aoaofa Fautulafono.

Ua faamalo le lagi e mama ua faamalo foi le soifua manuia i lenei taeao fou. E avea le leo faatauvaavaa e faatalofa atu ai ma le agaga faaaloalo i lau Afioga i le Palemia ae faapea le paia o le Kapeneta le mamalu o le Palemene ua mafai ona tatou faatasi e faataunuina le tatou galuega.

E faatalofa atu foi i le mafuta mai ma le faatasi mai o le paia o Faauluuluga o Matagaluega ma Faalapotopotoga eseese a le Malo ua mafai ona molimauina ai le tatou Fonotaga i le alofa ma le agalelei o le Atua. O outou paia e tumau e leai se iota e leai se mataitusi e suia pe oo i ai se upu a le Fofoga Fetalai pe leai, e tumau o Samoa ua uma ona tofi.

MALELEGA MAI LE AO O LE MALO

Na fofogaina e le Fofoga Fetalai le Malelega mai Lana Afioga Mamalu, O Le Ao o le Malo.

“TUSI mo:

Le Fofoga Fetalai:

E tusa ai ma le Mataupu 59 o le Faavae o le Malo Tutoatasi o Samoa, ua ou tuuina atu nei le malioga i le Fono Aoaofa Fautulafono na te iloiloina ai le Tulafono Tau Faaofi ua faaalua iinei:

1. Tulafono Tau Faaofi o Teuteuga o le Tulafono o Auaunaga Tau Tupe Faava o Malo 2017.
2. Tulafono Tau Faaofi o le Faafuaga o Taaloga Eseese Tau Tupe 2017.

TUUIINA ATU i lenei aso 8 o Novema 2017.

(Sainia): **Tuimalealiifano Vaaletoa Sualauvi II**
O LE AO O LE MALO.”

13 NOVEMA 2017

FAASILASILAGA MAI LE TAITAI O LE MAOTA

Na fofogaina e le Fofoga Fetalai le Faasilasilaga mai le Taitai o le Maota.

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoao Faitulafono mo le iloiloaina o Tulafono Tau Faaofi ua faaaliga iinei:

1. Tulafono Tau Faaofi o Teuteuga o le Faavae (Nu.3) 2017.
2. Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017.
3. Tulafono Tau Faaofi mo Kamupani Laiseneina mo Auaunaga Tau Mavaega 2017.
4. Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017.

TUUINA ATU i lenei aso 8 o Novema 2017.

(Sainia): **Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi**
TAITAI O LE MAOTA.

SAUNOAGA O MALIU

Na faasilasila e le Fofoga Fetalai le tuumalo o nisi o tamalii e toatolu sa avea ma sui usufono o le Palemene o Samoa i tausaga ua mavae.

i) *O le Afioga **LEILUA MANUAO**, o le sa avea ma sui usufono o le Itumalo Faaalaalafaga o Salega mo le Paeaiga 1979-1982, 1988-1991, 1991-1996, 1996-2001 & 2001-2006.*

*Sa avea le Afioga **LEILUA MANUAO** ma sui usufono o Komiti Filifilia o le Palemene i Paeaiga taitasi e pei ona taua i lalo:*

1979-1982 - Komiti o Tulafono Tumau ma le Komiti o Tulafono Tau Faaofi.

1988-1991 - Komiti o Tulafono Tau Faaofi.

1991-1996 - Komiti o le Maota ma le Komiti o Tulafono Tau Faaofi.

1996-2001 - Komiti o Tulafono Tau Faaofi ma le Komiti o Fefaatauaiga, Pisinisi ma Alamanuia.

2001-2006 - Komiti o Tulafono Tau Faaofi, Komiti o le Soifua Maloloina ma Auaunaga tau Agafesootai, Komiti o Iuni Faapalemene ma le Komiti o Galuega.

13 NOVEMA 2017

Saunoaga o Malii

- ii) *O le Afioga FEO NEMAIA, o le sa avea ma sui usufono mo le Itumalo Faaalaalafaga o Gagaifomauga Nu. 2. Na filifilia le Afioga FEO NEMAIA mo le Palemene i le aso 14 Me 1996 seia oo i le 2001. Sa avea le Afioga FEO NEMAIA ma sui usufono o le Komiti o le Maota, Komiti o Felauaiga ma le Komiti o Sootaga Faava o Malo, a o avea ai o ia ma sui usufono o le Palemene.*
- iii) *O le Afioga Hon ULUALOFAIGA TALAMAIVAO NIKO, o le sa avea ma sui usufono mo le Itumalo Faaalaalafaga o le Vaa o Fonoti. Na uluai filifilia mai le Afioga ULUALOFAIGA TALAMAIVAO NIKO i le Palemene i le Paeaiga o le 1976-1979. Sosoo ai ma le Paeaiga o le 1979-1982. Na toe filifilia mai i le Paeaiga 1988-1991 ma le 1991-1996. O le Paeaiga 1979-1982 sa avea ai le Afioga Hon TALAMAIVAO ma Minisita o Faamasinoga, ma o le taimi foi lena o Ia o se sui usufono o le Vaega Faaupufai e Puipua Aia Tatau a Tagata po o le HRPP. O le toe filifilia mai o TALAMAIVAO NIKO i le Paeaiga 1991-1996 sa avea ai ma sui usufono o le Vaega Faaupufai o le Samoa National Development Party po o le SNDP, ma o le Itu lena sa agaia le Malo. Ia avea ia lou leo faatauavaa e fai ma sui o lenei Palemene mamalu e molimoli atu ai faamaisega ma faamafanafanaga i le paia o Itumalo, faletua ma nofo a alo aemaise o aiga-alii ona o le toesea o e sa pele ia te outou, aemaise foi o i latou na o latou asaina ia le lavelave ma le gasu o le Palemene i futia ua sola ma lo latou auauunaga.*
- Na tutulai fifilemu le Maota mo le minute e tasi e faailoa ai lo latou faaaloalo i sui usufono ua tuumalo.*

TUUNA ATU O PEPA

Na tolaulau e le Failautusi Pepa nei ua faataatia i luga o le Laulau a Fono e tusa ai ma le T.T.48.

1. S.R. 2017/8, Tulafono o Tagata e Suesueina Mafuaaga Lilo o Malii 2017 – Faasilasilaga o le Amata Faamamaluina.
2. P.P. 2017/2018 Nu. 58, Lipoti Faaletausaga a le Iunivesite Aoa o Samoa, 1 Iulai 2015-30 Iuni 2016.
3. P.P. 2017/2018 Nu. 59, Lipoti o le Tulaga o Aia Tatau a Tagata Soifua 2017 a le Ofisa o le Komesina o Sulufaiga.
4. P.P. 2017/2018 Nu. 62, Lipoti Faaletausaga a le Pulega o Felauaiga i le Laueleele mo le Tausaga Faaletupe na faaiuina aso 30 Iuni 2016.
5. P.P. 2017/2018 Nu. 63, Lipoti Faaletausaga a le Matagaluega o Galuega, Felauaiga ma Atinae Eeseese mo le Tausaga 2015-2016.

13 NOVEMA 2017

Tuina atu o Pepa

6. P.P. 2017/2018 Nu. 64, Lipoti Faaletausaga a le Ofisa o le Pule Faatonu mo le Tausaga Faaletupe na faaiiina aso 30 Iuni 2016.
7. P.P. 2017/2018 Nu. 65, Lipoti Faaletausaga a le Ofisa o le Komesina o Faiga Palota mo le Tausaga Faaletupe 2013/2014.
8. P.P. 2017/2018 Nu. 66, Lipoti Faaletausaga a le Matagaluega o Tina ma Tamaitai, Atinae o Nu'u, Afioaga ma Agafesootai mo le Tausaga Faaletupe 2015-2016.
9. P.P. 2017/2018 Nu. 67, Faamatalaga o Tupe a le Malo mo le Tausaga Faaletupe na faaiiina aso 30 Iuni 2016.
10. P.P. 2017/2018 Nu. 68, Lipoti Faaletausaga a le Pulega o Uafu ma Taulaga mo le Tausaga Faaletupe 2015/2016.
11. P.P. 2017/2018 Nu. 69, Lipoti Faaletausaga a le Ofisa o le Komesina o Faiga Palota mo le Tausaga Faaletupe 2014/2015.
12. P.P. 2017/2018 Nu. 70, Lipoti Faaletausaga a le Matagaluega o Fesootaiga ma Faamatalaga Tekonolosi mo Tausaga 2011-2016.
13. P.P. 2017/2018 Nu. 71, Lipoti a le Afioaga Toomata Aki Tuipea i le Aoaoga Faakomiti o Tupe i le mataituina o Faigamalo sa usuia i British Columbia, 12-15 Iulai 2017.
14. P.P. 2017/2018 Nu. 100, Lipoti Komisi o le Toefuataiga o Tulafono a Samoa i le Pule a le Matai Sa'o (Lipoti Faaii 18/17, Fepuari 2017).
15. P.P. 2017/2018 Nu. 101, Lipoti a le Usugafono i le Fonotaga Lona 48 a Fofoga Fetala'i ma Failautusi o le Palemene na usuia i Sini Ausetalia, New South Wales, Ausetalia, 2-7 Iulai 2017.
16. P.P. 2017/2018 Nu. 102, Lipoti i le Fonotaga Lona 3 a le Fono a Sui Usufono o Palemene a le Itulagi a Asia ma le Pasefika i le Mataupu tau Soifua Maloloina i le Lalolagi, na usuia i Tokyo, Iapani, 24-25 Aokuso 2017.

TUINA ATU O LIPOTI A KOMITI FAA-PALEMENE

Na tolaulau e le Failautusi Lipoti a Komiti Faa-Palemene nei ua faataatia i luga o le Laulau a Fono e tusa ai ma le T.T.51(5).

1. P.P. 2017/2018 Nu. 72, Lipoti a le Komiti o le Vaega tau le Va Fealoai i le Tulafono Tau Faaofi o le Faamauiina o Tagata Solitulafono i Faiga Aiga Mataga 2017.
2. P.P. 2017/2018 Nu. 73, Lipoti a le Komiti o le Vaega tau le Va Fealoai i le Tulafono Tau Faaofi o Teuteuga o le Tulafono o Galuega Tau Leoleo 2017.
3. P.P. 2017/2018 Nu. 74, Lipoti a le Komiti a le Vaega tau le Va Fealoai i le Tulafono Tau Faaofi o Auupega Malolosi 2017.
4. P.P. 2017/2018 Nu. 75, Lipoti a le Komiti o le Vaega tau le Tamaoaiga i le Tulafono Tau Faaofi o le Pueina o Ata Tifaga (Faiga Faatosina Faapisinisi o Lafoga) 2017.

13 NOVEMA 2017

Tuuina atu o Lipoti a Komiti Faa-Palemene

5. P.P. 2017/2018 Nu. 76, Lipoti a le Komiti o le Vaega o Atinae Eeseese i le Tulafono Tau Faaofi o le Malosiaga Faasaoina 2017.
6. P.P. 2017/2018 Nu. 77, Lipoti a le Komiti o Tupe Maua ma Tupe Totogi i le P.P. 2016/2017 Nu. 189, Lipoti Faaletausaga a le Fale Meli a Samoa mo le Tausaga 2016.
7. P.P. 2017/2018 Nu. 78, Lipoti a le Komiti o Tupe Maua ma Tupe Totogi i le P.P. 2017/2018 Nu. 4, Lipoti Faaletausaga a le Pulega o Tupe Faava o Malo a Samoa 2016.
8. P.P. 2017/2018 Nu. 79, Lipoti a le Komiti o Tupe Maua ma Tupe Totogi i le P.P. 2017/2018 Nu. 10, Lipoti Faaletausaga a le Kamupani o Pulega a le Faaputugatupe Teufaafaigaluega o Mavaega Tausi a Samoa 2016.
9. P.P. 2017/2018 Nu. 80, Lipoti a le Komiti o Tupe Maua ma Tupe Totogi i le P.P. 2017/2018 Nu. 7 & Nu. 11, Lipoti Faaletausaga a le Pulega o Tagata Tafafao Maimoa Mai 2015 & 2016.
10. P.P. 2017/2018 Nu. 81, Lipoti a le Komiti o Tupe Maua ma Tupe Totogi i le P.P. 2017/2018 Nu. 12, Lipoti Faaletausaga a le Faalapotopotoga Inisiua tau Soifua a Samoa 2016.
11. P.P. 2017/2018 Nu. 82, Lipoti a le Komiti o Tupe Maua ma Tupe Totogi i le P.P. 2017/2018 Nu. 40, Lipoti Faaletausaga a le Pulega o Tinei Mu ma Faalavelave Tutupu Faafuasei 2016.
12. P.P. 2017/2018 Nu. 84, Lipoti a le Komiti o Tulafono Tumau i le P.P. 2017/2018 Nu. 47, Lipoti Faaletausaga a le Matagaluega o Faamasinoga ma Pulega tau Faamasinoga 2014/2015.
13. P.P. 2017/2018 Nu. 85, Lipoti a le Komiti o Tulafono Tumau i le P.P. 2016/2017 Nu. 134, Nu. 135, Nu. 136 & Nu. 139, Lipoti a le Pule ma Suetusi Sili e uiga i Tulaga Faaletonu 2012-2013, 2013-2014, 2014-2015 & 2015-2016.
14. P.P. 2017/2018 Nu. 86, Lipoti a le Komiti o Tulafono Tumau i le P.P. 2016/2017 Nu. 155, Lipoti Faaletausaga a le Komisi o le Toefuataiga o Tulafono a Samoa 2016.
15. P.P. 2017/2018 Nu. 87, Lipoti a le Komiti o Tulafono Tumau i le P.P. 2017/2018 Nu. 9, Lipoti Faaletausaga a le Matagaluega o le Palemia ma le Kapeneta 2015.
16. P.P. 2017/2018 Nu. 88, Lipoti a le Komiti o Tulafono Tumau i le P.P. 2017/2018 Nu. 13, Lipoti Faaletausaga a le Komisi o Galuega a le Malo mo le Tausaga 2015.
17. P.P. 2017/2018 Nu. 89, Lipoti a le Komiti o Tulafono Tumau i le P.P. 2016/2017 Nu. 110, Lipoti o le Penisione mo le Palemene 2016.
18. P.P. 2017/2018 Nu. 90, Lipoti a le Komiti o le Vaega tau le Va Fealoai i le P.P. 2017/2018 Nu. 5 & Nu. 6, Lipoti Faaletausaga a le Matagaluega o Leoleo 2014 & 2015.
19. P.P. 2017/2018 Nu. 91, Lipoti a le Komiti o le Vaega tau le Va Fealoai i le P.P. 2017/2018 Nu. 2, Lipoti Faaletausaga a le Matagaluega o le Soifua Maloloina 2015.

13 NOVEMA 2017

Tuina atu o Lipoti a Komiti Faa-Palemene

20. P.P. 2017/2018 Nu. 92, Lipoti a le Komiti o le Vaega tau le Tamaoaiga i le P.P. 2017/2018 Nu. 8, Lipoti Faaletausaga a le Matagaluega o Pisinisi, Alamanuia ma Leipa 2016.
21. P.P. 2017/2018 Nu. 93, Lipoti a le Komiti o le Vaega tau le Tamaoaiga i le P.P. 2017/2018 Nu. 14, Lipoti Faaletausaga a le Faalapotopotoga o Eleele a Samoa 2016.
22. P.P. 2017/2018 Nu. 94, Lipoti a le Komiti o le Vaega o Atinae Eeseese i le P.P. 2017/2018 Nu. 3, Lipoti Faaletausaga a le Faalapotopotoga o Vaa a Samoa 2016.
23. P.P. 2017/2018 Nu. 95, Lipoti a le Komiti o le Vaega o Atinae Eeseese i le P.P. 2017/2018 Nu. 46, Lipoti Faaletausaga a le Matagaluega o Punaoa Faalenatura ma Siosiomaga 2016.
24. P.P. 2017/2018 Nu. 96, Lipoti a le Komiti o le Vaega o Atinae Eeseese i le S.R. 2017/4-Tulafono Faatonutonu o le Eletise (Totogifuapauina) 2017, & S.R. 2017/6-Tulafono Faafoe o Fesootaiga (Puipuiga o Tagata e Faaogaina Auaunaga) 2017.

**TULAFONO TAU FAAOFI O TEUTEUGA O LE FAAVAE (NU.3)
2017 – faitauga muamua**

Susuga Hon TUILAEPA AUFLUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai ou te muamua lava ona faatalofa atu i lau Afioga ma le paia maualuga foi o le tatou maota nei. Faafetai i le tapuaia ma tou tatalo i le taimi foi ao ou saili fofo atu i Niu Sila ia lea ua ou toe foi mai. Ia ma o lena ua outou silasila mai i le malosi o lau tu ma le sao ma le mamafatu o le ula lea ou te ulaina, atagia ai i ina o le matua malosi atoatoa o le Taitai o le Malo. Faafetai tele i a outou talosaga.

Ou te faatalofa atu foi i le tapuaiga i le tatou Malo i le afio O Le Ao Mamalu o le Malo, ia faapea foi Sui o le Fono a Sui Tofia, le Tafatolu o Pulega Malo, le Tafatolu e Faafetauagai, ia o paia lava aua le tapuaiga i Aiga ma a latou Tama, Tumua ma Pule, Ituau ma Alataua, Aiga i le Tai ma le Vaa o Fonoti, ia faapea foi le faanonogamanu i le Aufaitatalo. Ua vaeseuga foi talu le tatou Fonotaga talu ai, na le faataunuuna le isi Fono na atofa ia a o lenei ua faataunuuna i le aso. Faafetai i le Atua i le molimoli mai o lo outou soifua ia ma so matou ola aua o tatou tiute na tatou tauto ai i totonu o le Palemene leni.

Lau Afioga i le Fofoga Fetalai, ou te tulai atu ma le faaaloalo lava e faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.3) 2017 i lona faitauga muamua.*

Faaluaina e le Minisita mo Tupe Maua, Minisita mo le Soifua Maloloina ma le Minisita mo Pisinisi ma Alamanuia.

Na faamaonia le lafo ma faitauina le Tulafono Tau Faaofi i lona faitauga muamua.

13 NOVEMA 2017

**TULAFONO TAU FAAOFI O TEUTEUGA O LE TULAFONO O
GALUEGA TINEI MU MA FAALAVELAVE TUTUPU FAAFUASEI
2017 – faitauga muamua**

Susuga Hon TUILAEPA AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafluasei 2017 i lona faitauga muamua.*

Faaluaina e le Minisita mo Pisinisi ma Alamanuia, Minisita mo Soifua Maloloina, Minisita mo Tupe Maua ma le Minisita mo Tagata Tafafao Maimoa mai Fafo.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
TULAGA MAMALU MA FAAILOGA TAUALOA 2017
– faitauga muamua**

Susuga Hon TUILAEPA AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tulaga Mamalu ma Faailoga Tauualoa 2017 i lona faitauga muamua.*

Faaluaina e le Minisita mo Pisinisi ma Alamanuia ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O LE FAAFOEGA O TAALOGA ESEESE
TAU TUPE 2017 – faitauga muamua**

Afioga Hon LAUTAFI FIO SELAFI PURCELL (Minisita mo Taaloga Eeseese tau Tupe): Faafetai atu i lau Afioga i le Fofoga Fetalai, ia a o le i avatua se tala i lenei taeao, e muamua foi ona faatalofa atu i le mamalu o le tatou Maota nei lau Afioga i le Fofoga Fetalai ma le mamalu i le Taitai o le Malo, le paia o le Kapeneta, Minisita Lagolago faapea sui usufono mamalu uma ua faatasi mai i lene taeao.

E faatalofa atu foi i le mamalu o le tapuaiga a Samoa, amata mai lava i ona ao seia oo i ona iu. Faamalo le tapuai, faamalo le tauatai. E faatalofa atu foi isi ou itumalo o Satupaitea, malo lava i la outou faitatalo, o lo o manuia pea la outou sui usufono.

13 NOVEMA 2017

**Tulafono Tau Faaofi o le Faafoga o Taaloga Eeseese Tau Tupe 2017
– faitauga muamua**

Lau Afioga i le Fofoga Fetalai ua ou tulai atu e faatu se lafo, *Ina ia faitauina nei le Tulafono Tau Faaofi o le Faafoga o Taaloga Eeseese Tau Tupe 2017 i lona faitauga muamua.*

Faaluaina e le Minisita mo le Soifua Maloloina, Minisita mo Tupe ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O TEUTEUGA O LE TULAFONO O
LAFOGA O TUPE MAUA (NU.2) 2017 – faitauga muamua**

Afioga Hon TIALAVEA FEA LENIU TIONISIO HUNT (Minisita mo Tupe Maua): Faafetai i lau Afioga i le Fofoga Fetalai mo le avanoa. Ia e faatalofa atu foi i lau Afioga ma le paia o le Maota nei, afifio i le Afioga i le Palemia ma le Kapeneta faapea Sui Minisita aemaise foi sui usufono o le Palemene aemaise foi Faauluuluga o Faalapotopotoga a le Malo ma Matagaluega ua tatou faatasi i lenei taeao. E faatalofa atu foi i le faafogafoga a Samoa aemaise si ou itumalo i le Vaa o Fonoti.

Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 i lona faitauga muamua.*

Faaluaina e le Minisita mo Pisinisi ma Alamanuia ma Leipa, Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Faatoaga, Vaomatua ma Faigafaiva.

Na faamaonia le lafo ma faitauina le Tulafono Tau Faaofi i lona faitauga muamua.

**TULAFONO TAU FAAOFI O KAMUPANI TAUSI MAVAEAGA 2017
– faitauga muamua**

Afioga Hon SILI EPA TUIOTI (Minisita o Tupe): Faafetai tele i lau Afioga i le Fofoga Fetalai mo le avanoa.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Kamupani Tausi Mavaega 2017 i lona faitauga muamua.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Aoga, Taaloga ma Aganuu ma le Minisita mo Faamasinoga ma Pulega Tau Faamasinoga.

Na faamaonia le lafo ma faitauina le Tulafono Tau Faaofi i lona faitauga muamua.

13 NOVEMA 2017

TULAFONO TAU FAAOFI O TEUTEUGA O LE TULAFONO O FAAPUTUGA OA FAAVAE RESITALAINA 2017 – faitauga muamua

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faaputuga Oa Faavae Resitalaina 2017 i lona faitauga muamua.*

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Aoga, Taaloga ma Aganuu ma le Minisita mo Faamasinoga ma Pulega Tau Faamasinoga.

Na faamaonia le lafo ma faitauina le Tulafono Tau Faaofi i lona faitauga muamua.

LAFO MO LE FAATAATIAESE O TULAFONO TUMAU 101(1)

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo e faatu le lafo, *Ina ia faataatiaese Tulafono Tumau 101(1) ina ia avanoa ai le faitauga faalua o Tulafono Tau Faaofi ia ua maea ona faitauina muamua i le aso fono lenei.*

Faaluaina e le Minisita mo Pisinisi ma Alamanuia, Minisita mo Aoga, Taaloga ma Aganuu ma le Minisita mo le Soifua Maloloina.

Na faamaonia le lafo ma tulai ai le Tulafono Tumau 101(1) ua faataatiaese.

**TULAFONO TAU FAAOFI O TEUTEUGA O LE FAAVAE (NU.3)
2017 – faitauga faalua**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Faavae (Nu.3) 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo Pisinisi ma Alamanuia, Minisita mo le Soifua Maloloina ma le Minisita mo Tupe Maua.

FOFOGA FETALAI: Ia o le avanoa lenei e malele ma saunoa ai lau Afioga i le Palemia.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
– faitauga faalua

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le Teuteuga leni o le Faavae mo le aiaiga fou o le tofiaina O Le Ao o le Malo o Samoa, o se mataupu taua, na agai i ai finagalo faaalua o sui usufono o le vaega leni o le HRPP, e 47 le aofai o sui usufono mai le 50 le aofai o Nofoa o le Palemene leni. Na latou saunoa ai, ina ua toe filifilia le nofoaiga fou O Le Ao o le Malo lea ua tofia nei i ai le Afioga i le Tamaaiga Tuimalealiifano Vaaletoa.

Na fautuaina ai au ma le Kapeneta ia pe na faatonuina foi, e tapena se Teuteuga o le tatou Faavae, lea la ua taoto nei i le Laulau a Fono lena Teuteuga e pei ona augani mai ai le toatele o sui usufono o leni vaega i lana Fonotaga. Tatou tomanatu i aiaiga o le tatou Faavae na pasia e le Fono Faavae i le 1960, e tauave e Tupua Tamasese Meaole ma Malietoa Tanumafili II le tofiga mamalu O Le Ao Soofaatasi o le tatou Malo o Samoa, Joint Heads of State, ma e tuu afu la nofoaiga. O lona uiga, e tuu oti. A tuumalo le toatasi ona tauave lea e le isi o soifua pea seia oo foi ina valaau le Atua ia te ia. Ae a tuumalo foi ma lē o lo o faaauauina le tofiga ona taoto mai lea i le Palemene, na te filifilia se isi e tauavea le tofiga O Le Ao o le Malo o Samoa mo le tai 5 tausaga ma toe filifilia.

Pe a tatou toe tomanatu foi, o le Fono Faavae lea na faia nei Tulafono Faavae a le Atunuu, sa soalaupule aiaiga uma faaiu o le tatou Faavae po o le Tulafono Faavae, sa aofia ai sui taitoafa o faatumutumuga o itumalo uma o Samoa, o latou ia e faia tonufai o latou itumalo, ma e sa matua saausi lo latou soalaupuleina o le Faavae o Samoa, na taitai le Tama Aiga ia Tupua Tamasese Meaole, Malietoa Tanumafili II ma Mataafa Faumuina Mulinuu II. O aiaiga foi na pasia e le Fono Faavae na matua maoti lelei ma tuu i totonu o le Faavae. Na muamua tuumalo Tupua Tamasese Meaole, ona faaauau lea e Malietoa ona tauave le tofiga mamalu O Le Ao o le tatou Malo.

Na tuumalo Malietoa Tanumafili II i le tausaga e 2007, ona tofia ai lea e le Palemene Tupua Tupuola Efi e avea ma uluai Ao o le Malo filifilia e le Palemene mo le lima tausaga e tusa ai ma le tatou Faavae.

Na toe filifilia foi Tupua Tamasese Efi i le 2012 mo le isi lima tausaga faaopoopo. Na maea le lima tausaga faaopoopo lea po o tausaga sosoo ia e lima o Tupuola Efi i le tausaga nei 2017, ona filifili ai lea o Tuimalealiifano Vaaletoa i le 2017 i le tausaga leni mo le isi lima tausaga o lumanai ai. A oo i le 2022, ona toe filifili foi lea e le Palemene e pei ona faatonu mai e le Tulafono Faavae o Samoa na faataatia mai e o tatou tuua.

A o faagasolo le faatalanoaga e le Faafaletui leni o le HRPP mo le toe filifilia O Le Ao Mamalu o le Malo ina ua maea le taimi faatapulaaina na faatonu mai e le Faavae, sa fulisia finagalo, e ao ia ona toe faatulaga faaetulafono le umi o le tofiga. Talu ai, pei e mataga foi lele i le tatou agaifanua, le uma o le tofiga ona toe lafo mai foi lea i sui usufono o le Palemene e latou te palota i ai mo seisi o le a tofia mo le isi foi vaitaimi e lima tausaga. Afai e tofia se sui fou i le tofi, ona faapea lea o le sui tuai, *'a, ua latou tulia ia au nei.'*

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
– faitauga faalua

Ae afai foi e faaaau le sui tuai, ona le fafia foi lea o le sui faaolioli ua faapea ane, *'ua le amanaia o ia e le Palemene lenei.'* Aemaise i se atunuu ua matua laitiiti tele e pei o Samoa. Ua tai fesootai aiga uma lava, ua aiga uma lava tagata uma. E tupu ai lagona matamuli i sui usufono o le Maota lenei e faia tofiga. Mo se faaitaiga, o le toatele o sui usufono iinei i le Palemene lenei, e aiga i le Tuiatua, toe aiga foi i le Tuiaana. O au ia, e fa Aiga tetele o Samoa ou te matai ai. O le tolu o ou matai, o matai e faapitoa i le Tuiatua, ae na o le tasi le Aiga Sa Malietoa.

O lagona ia e tutupu. Ae e tatau ona toe teuteu le Faavae i se auala e le toe tulai mai ai ia le matamuli. Ia ma e na ou molimoli mai lava i le Palemene lenei i le taeao na ou tulai atu ai, e faatu le lafo e fofoga ai Samoa ma ave ai le faamalo i le Afioga ia Tuimalealiifano e tusa ai o lona valaauina e le Atua e avea ma Ao o le Malo. Na ave ai foi ma le faafetai ia Tupua Tamasese o le Tuiatua e tusa ai o lona tauaveina i le sefulu tausaga ua tuanai o le tofiga O Le Ao Mamalu. Sa ia tauave ai i le atoatoa le mamalu o lea foi tofiga. Sa ou taua manino ai i lena foi lauga i totonu o le Palemene lenei le agaga molimoli o le 47 sui usufono o le vaega lenei e mafuli i ai le Maota mai le 50 o Nofoa o le Palemene, e tatau ona faataoto ia se aiaiga faale-Faavae e matua faataatia ai ma faamaoti le tofiga i le tai lima tausaga e pei ona i ai nei. A maea le uluai lima tausaga, ae toe finagalo le Palemene e toe tofia le sui o lo o tulai i le foe mo se isi lima tausaga, o lana toe lima tausaga lena. A maea, ona otometi lava lea ona malolo manumalo. O lona uiga, ua faataoto mai e le tulafono ae le toe faia i ai se finagalo o sui usufono o le Palemene. O le a le toe faasiugutua ai foi la ma le Maota i se faaiuga aua o le faaiuga ua faataoto e le Faavae. O le tofiga O Le Ao Mamalu lau Afioga i le Fofoga Fetalai ma sui usufono mamalu o le tatou Maota nei, e pei foi o Sui Tofia, o tofiga e faamalumalu, po o le faamaepaepa ma silamaimoa. E ese mamao lava ma le tofi Palemia, Fofoga Fetalai ma le Faamasino Sili. O i latou uma nei e toatolu, e galulue e faagaioi le Malo. O ana tonufai ma galuega fai, ae lagolagosua i ai le aufaigaluega a le tatou Malo. O latou uma ia le Palemia, le Fofoga Fetalai ma le Faamasino Sili ma le aufaigaluega atoa a le Malo, e faaeleelea, e faasusu ma faatimu, ma faalala, e suati le palapala, e faasuauu ma faagao mea ua elea, toe faufau mea ua malepelepe, ona o ni afa, tanu ma faaea eleele ua magoto ma aia ini Tsunami ma toe faalele le tatou fua vaalele tele pe a vaai atu e gauaano ai i tatou i le faaaau pea o se faigapaaga ua le talafeagai, ae le na o le nofonofa lava ma faapea ane, 'aue, i se mea e le talafeagai. A o Le Ao o le Malo, o se tofiga o lo o aumai manino i totonu o le Faavae. E faamaepaepa ma faamalumalu, ma silamaimoa.

Lau Afioga i le Fofoga Fetalai, e le fou la le Teuteuga lenei o le tatou Faavae, ua taoto i le Laulau a Fono a le Palemene, aua foi ua uma ona faatalanoaina e le 47 sui usufono i le latou fono faa-Faletui ma aumai ai ia te au ma le Kapeneta le faatonuga, tapena loa le Tulafono.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
– faitauga faalua

Ua uma foi ona ou aumaia i totonu o le Palemene lenei ma ou faailo ai aloaia aua le faafogafoga a lesi tolu sui o totoe o le Palemene, e le i faalogologo muamua i ai ma auai i le fonotaga a le vaega lenei, ma faalauiloa foi i le faafogafoga a Samoa atoa, e aofia ai foi ma latou po o le Afioga i Le Ao Mamalu ua tofia.

O se tofiga mamalu foi, e oo i le sefulu tausaga, o se taimi umi, e le o se taimi puupuu. Ma ua tele foi lenei faaaloalo ua faia e le Palemene o Samoa, i se tofiga e faamalumalu, e faamaepaepa, ma silamaimoa. O lo o aiaia i le Tulafono, a uma ona soalaupule ona faasee atu lea i le Komiti e gafa ma le Tulafono lenei, e mafai ai foi ona toai i ai lo tatou atunuu i ona sui usufono o le Fono Aoao Faitulafono e toe faalia ai o latou finagalo i le Tulafono, mo se taimi umi ona toe foi mai ai lea i le tatou Palemene nei mo se faaiuga faaii.

Lau Afioga i le Fofoga Fetalai, o le faamatalaga manino lena i lenei Tulafono Tau Faaofi taua.

FOFOGA FETALAI: Malo faafetai. Ua malele faamalamalama lau Afioga i le Palemia e tusa ai o le Teuteuga ma lenei Tulafono Tau Faaofi.

Ma o le avanoa lenei, masalo ua nofofale ia Satuiamaa i finagalo ma lagona ma ua manino foi folasaga. Ma e le o se mea fou nei ananafi, o le mea sa faapena ona faataoto mai, a o lea ua faatino i le tatou foi vaitau lenei, ia o nisi o popolega ma atugaluga, e faapena, e pei ona saunoa le Afioga i le Palemia.

Afai e leai se isi e fia saunoa, o le a tuuina atu loa le fesili aua o lea e maua, e foi i le Komiti e 90 aso ia ona toe aumai lea, e lelei foi lena e faatemokarasi e maua ai le avanoa o le atunuu aemaise foi o sui usufono mamalu o le Palemene e toe fai ai ni o outou finagalo.

Ia se i tuu atu muamua le avanoa i le sui usufono muamua lea na tulai mai o le sui usufono mo Falelatai ma Samatau.

Afioga TAEFU LEMI (Falelatai ma Samatau): E faatalofa atu i lau Afioga i le Fofoga Fetalai i lenei taeao, o le taeao manino ma le taeao totoa. E faatalofa atu foi i le paia o le Palemene o Samoa, lau Afioga i le Taitai ma le paia o le Kapeneta, a o le lavalaoa o le Fonousu a Samoa.

E faatalofa atu foi i le tapuaiga a Samoa i lau tou fita faafogafoga i lenei taeao, lau Afioga i Le Ao Mamalu o le Malo, aemaise foi o le Sui o le Fono a Sui Tofia. O paia lava ia aua le tapuaiga a Aiga ma Tama, o Tama foi ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Lau Afioga i le Fofoga Fetalai ua manatu e fai se tala i lenei taeao e tapuaia le Fonousu a Samoa e le Aufaigaluega Totofi a le Atua, aemaise foi o le faafogogaaga a Samoa. A o se mataupu foi ua taua tele le mataupu e pei ona saunoa i ai le Taitai o le Malo i lenei taeao. O Samoa lava ia o le atunuu ua uma ona tofi, ua iloga lava Aiga o Samoa, Aiga o Tupu, Aiga o Nofo, Aiga o Papa, Aiga na Tafai. E leai lava se isi na te toe suia pe sii se matalalaga, ua taoto upu o le atunuu. Fai mai e uliuli le sami, ae iloga lava ala o ia.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

E lavelave foi le vaofilifili, ae iloga lava ala o aliiseu. E maualuga ma manino le vateatea, ia ua iloga lava matagi ma ona itulagi.

O lenei taeao ma le matou faalogologo lau Afioga i le Fofoga Fetalai, faafetai tele, faafetai mo le Tulafono. Ia e momoli atu ai foi ma le faafetai a lenei itumalo, ua oo mai le faasoa o la outou pule sa to mai ma le faaeaea i le tapuaiga ma le tapuaiga leoleoa a lenei itumalo sa fai mai i tausaga e fia. Faafetai o lele ua ea le tautua ua ave i ai la outou faamumua mo lenei 5 tausaga e fai sana tautua, ia aua le Malo o Samoa.

Faafetai foi i le tapuaiga a si ou itumalo i le Aiga Tauaana ma le latou Tama, Galuefa ma le Tula o Salogo, ia Vaeolenofoaia ma Falelatai ma Tagata o le Vavau. Ae a le Falefa o le Usoalii, Fiame ma le Tamaitai, ia nofo ituaiga ia te oe Leulumoega, malo taputapu, faafetai tatalo. A o le Tulafono ua i lumamea e Teuteu ai le Faavae o Samoa, ia ua manatu lenei itumalo ua tatau ma talafeagai. Leaga e pei ona ou taua ua iloga aiga o le atunuu, ia ae momoli le agaga faafetai o lo o mau pea le toovae i le tatou Malo, mau pea le iumaea i le paia o le Palemene o Samoa lea lava e tausi mamalu, lea lava e tausi au Tamaaiga. Ua lagona ai le mafanafana e le o valetuulima le Malo o Samoa e Faavae i le Atua, ia a o lea lava e tau aapa lava i le moa o le ala e soifua ai ma ola o tatou tagata. O le mea lea e momoli ai lau faafetai i le Tulafono ua taoto mai nei.

Lau Afioga i le Fofoga Fetalai, ia e i ai le manatu e pei lava ona ou taua, ia aua o tofiga O Le Ao o le Malo ia e leai foi e tatou te manatu e pei o le upu e masani ai tala, ia faapolokiki le faiga o lea tofiga. Ia o lea ua fai le Teuteuga o le Faavae ina ia sosolo malie sosolo filemu. A ua ou manatu foi, o se Tulafono e nofo lelei ai aiga o Samoa, o se Tulafono e faatupu ai le filemu, o le Tulafono o le avafatafata ia ma le faaaloalo. E taulamua ma faamaite mea ai lau Palemene ina ia sosolo ai lelei le nofoaiga ma le see atu o lea Ao o le Malo ma lea Ao o le Malo, e leai lava se isi mea o toe gase, ua uma ia aso sa vatau ai Samoa ma femateai aiga o le taimi lenei, ia o le taimi o le Atua. E tatau lava ona faasolo ma tuumatamaga le tofi o le ta Ao o le Malo, ia ae ua malamalama le nonofo ai o Samoa. O le mea lea e momoli ai lau faafetai lau Afioga i le Fofoga Fetalai, faafetai o lo o i ai lava le manatu e le o faapito manu ia tasi, o Tamaaiga ua iloga, a ua faasoasoa lima lelei e lau Palemene, ia o se paeaiga a lea Tamaaiga o se paeaiga a lea Tamaaiga. Ia see ane, see ane faaao o le ta Malo. Faafetai lau Afioga i le Taitai o le Malo ia ma le Kapeneta aemaise le Vaega Faaupufai, faafetai i lau faaeaea. E le manatu faatauvaa i nisi o Tamaaiga, e pei lava ona ou taua, o tama ua faae i ai ia paia ma papa o Samoa, o Tamaaiga uma lava, peitai ia o lea ua fai lau faasoa, ia e faaeaea i Tamaaiga uma lava o e lava ua nofoia, ia ua faigofie lenei Tulafono, ia ona faasolosolo i latou i le nofoa lea.

O le mea lea ou te faafetai ai au i le Tulafono lau Afioga i le Fofoga Fetalai, e filemu ai le tatou galuega ia ma taofi ai le sai mai i le paia o le Palemene i taimi e fesui ai tofiga.

Lau Afioga i le Fofoga Fetalai, o lau faafetai lea i lenei taeao, ua tuu atu ai ma lau lagolago i le Tulafono Tau Faaofi ua i lumamea. Manuia le Fono.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

FOFOGA FETALAI: Malo, faafetai. Ia masalo pau lea o le sui usufono sa tulai mai.

Ia tuu atu ia le avanoa i le alii matua i le toe ulutaia o lea itu o le Maota, le sui usufono mo Falealupo.

Afioga Hon AEAU PENIAMINA LEA VAISEETA (Falealupo): Lau Afioga i le Fofoga Fetalai, le pau o le Palemene o Samoa, i le ava e tatau ai ma le agaga faaloalo ou te tulai ai i le mamalu lea ona o le tatou mataupu o le Laulau a Fono, o se mataupu o lo o faafofoga le atunuu. Atonu o le ooga lea o le tapuaiga a le atunuu i ona sui usufono i le Maota lenei.

E i ai mataupu e le laumaua i tupulaga lona taua ma le tatou ona soalaupule e oo i ona ooooga i lenei la taeo, faafetai la i le alofa o le tatou Matai i le lagi, aumai ai le agaga malamalama toafimalie i le Maota lenei.

Lau Afioga i le Palemia ma le mamalu o lena itu i upufai o Samoa, faafetai aua aisea? E lagona e amuia lenei Paeaiga o lo o soalaupuleina ai lenei mataupu sili ona taua i le faafofogaaga a le atunuu. Leaga e afua atu nei ae alualu pea o le mamalu lea o le atunuu i ona tulaga faaupufai ma le faataatiaga foi o le mamalu o le atunuu i ona mamalu oooo tutu, faafetai i le Atua. O le faafetai la i lenei taeo lau Afioga i le Palemia, se faamalo ma le tatou Palemene i le toafimalie ma aumai lenei mataupu tatou te soalaupule o lea ua maua lelei ai, leai lava se mea o gase, i le faatofalaiga oooo ae se i faafofoga le atunuu. Leaga o le taeo lenei, e faamaape ai lea tulaga mo le lumanai. Sau aso alu aso, ae o le faagasologa lenei lea ua faataatia ma tatou soalaupuleina, faafetai i le Atua i Lona toafimalie, ua aumai e lau Afioga i le Palemia, e malamalama lelei. Leaga e pei... ae amuia lenei Palemene ua latou soalaupuleina le tulaga lea. Lea ua aumai manino faafofoga le atunuu o le itu taua lava lea ia te au ia lenei Paeaiga ua tatou soalaupuleina ai le mataupu lenei i le tulaga lenei i ooooga o mamalu faaleatunuu i ona pulega lea e momoli atu ai le agaga faafetai. O lau lea tulai atu lau Afioga, leaga e taua e soalaupuleina toafimalie, ia tau lau o le faamoemoe, matou te lagolagoina, faafetai.

FOFOGA FETALAI: Malo malele faafetai saunoa i lau Afioga i le matua o le toe ulutaia o lena itu o le Maota, malo faafetai.

E maitau atu tulai mai le sui usufono mo Salega. Ia tapa ma le faaloalo lau Afioga i le sui usufono mamalu mo Salega Sasae.

Tofa OLO FITI AFOA VAAI (Salega Sasae): Ia faafetai i lau Afioga i le Fofoga Fetalai, ua maua so matou avanoa i lenei foi mataupu taua. E faatalofa atu i lau Afioga, ia faapena foi ona ou faatalofa atu i le Afioga i le Palemia ma le aiga Kapeneta, ia ma sui usufono mamalu o lenei Palemene.

E faafetai atu i le Afioga i le Palemia mo se folasaga manino, o se folasaga taua ia ua manaia foi le faalogologo atu o se finagalo autasi a le 47 itumalo mamalu o lo o faapena o lena vaega o lo o pulea lo tatou Malo. Ia o upu a le atunuu e leai se faiva e asa ma se maumau, ese foi nai o matou lagona.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
 – faitauga faalua

Ia e le faapea o ni lagona e faatautee po o le a se itu, ae o lagona e faatupu manatu ma toe silasila i ai lo tatou Malo.

Lau Afioga i le Fofoga Fetalai, o le a tau amata mai se matou faamatalaga i nisi o vaega i le aotelega o le Tulafono ona e i ai le sootaga ma se vaivaiga o lenei itumalo. I le amata mai i le tofiaina O Le Ao Mamalu o le tatou Malo, lau Afioga o lo o manino lava le Tulafono Faavae e tofia ma filifili e se vaega faaupufai toatele oi o le Fono Aoaofaitulafono, tofia e le Fono Aoaofaitulafono, ona i ai lea ma se fuaiupu mulimuli ane, i luga o se fautuaga a se vaega faaupufai, e pei o lea ou te talanoa atu i le vaega lea.

O le upu moni lau Afioga i le Fofoga Fetalai, e le i faatinoa le uiga moni o le Tulafono Faavae lea. Ae manatua foi lau Afioga i le Fofoga Fetalai, o tofiga a le atunuu e faia i maota ma laoa tofia e i ai le Maota Fono lenei. Na pau lava le laasaga sa faia e le tatou Maota, o le faamaonia o le tofiga na faia e le vaega faaupufai, na fai mai i tua e le i faia i totonu o le Maota Fono lenei. O lea la lau Afioga i le Fofoga Fetalai, o le alafua lena e pei ona manino mai ai le Tulafono. Sa ou manatu e faatino faiga faapalemene i totonu o le Maota lenei.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E tatau ona faasao le sese lea e saunoa soo i ai le sui usufono. O le uma ai o le faiga filifiliga, le upu lea o le faiga filifiliga a le vaega lenei, e na o le pau lava lena o le mea e oo i ai ia le malosi o le vaega lenei, ae le oo i le tofiga, o le tofiga faatoa faia i totonu o le Maota lenei, o le Tulafono lena.

Ina ua uma le filifiliga, masalo po o le ta o le 6:00, ou te oo mai i le fale o le Afioga lea ia Tuimalealiifano, ae taunuu atu ia sui e toalua o le media, ‘ua matou maua ua uma ona outou tofia ia Le Ao o le Malo,’ o lau tali e le i faia le tofiga. Toetiiti atoa le itula o ou talanoa i ai, e le i faia le tofiga. ‘A o lea ua matou maua mai i isi o Tuimalealiifano,’ ou fai atu e le i faia le tofiga. **O le tofiga faatoa faia i totonu i i ina ua faatu le lafo ma pasia, aua o le tofiga lena e fai e tatou.**

Lau Afioga i le Fofoga Fetalai, o isi atunuu e fai e le Palemia ia o latou Ao o le Malo, aua foi o le Palemia o le Taitai lea o le vaega toatele, o lo o tu i le foe e pulea le Faigamalo i na atunuu, na o le Palemia lava ma le Kapeneta, uma.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

A o tatou i lalo o le Faavae e aumai i totonu i i. Ina ua faamaonia e le Maota lenei, ia ona ou toe valaau lea i media ia, e lelei ona tou malamalama o le ala lena na ou tau atu ai ananafi, anapo e le i faia le tofiga, aua pe te i ua o atu ae toe sui ia finagalo o le Maota i luga o lauga e faia i totonu, ia po o fesootaiga e faia i totonu, ia ona sui atoa lava lea, ae le i faatinoina le filifiliga sa fai i le po anapo. Lau Afioga i le Fofoga Fetalai, o le uiga moni lena o le upu o le palota i totonu iinei ma faamaonia o le tofiga le mea lena.

FOFOGA FETALAI: Malo, manino le auofala i lea vaega. Tulai mai le sui usufono e faaauau le saunoaga.

Tofa OLO FITI AFOA VAAI: Faafetai i lau Afioga o le a leai se ma faafinauga i le mataupu lea, ae ana faapea e tofia i totonu o le Palemene e fai i totonu o le Maota lenei se palota, e tusa ai ma aga faatemokarasi ma aga faapalemene, e le i faia i totonu iinei sa fai i fafo. E ui i lea lau Afioga i le Fofoga Fetalai, e agai sau tala i le Teuteuga o lenei Tulafono, ma e ou te faamalulu atu i lau Afioga.

FOFOGA FETALAI: Se i tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Lau Afioga i le Fofoga Fetalai, e i le Malo le upu faaii, o se finauga. Afai e te tulai mai faa afe, ona e tulai mai e faamautu se mau e le faavaea, ou te tulai atu foi faa afe ma le tasi, e faasao le mau, o lena e sese. Na faia e le Maota lenei le tofiga.

FOFOGA FETALAI: Malo, ou te le toe faatagaina le sui usufono mamalu i le itu lea, aua e le faia se faafinauga. O le mea e saunoa atu ai le Malo, that's final. Ae le faia i se mea e te finagalo i ai ma lau faauigana. O lenei lava e tuu atu le avanoa le sui usufono mamalu e, o oe foi o le toaina tuai e te iloa taalo i le polokiki. Ia tulai mai le sui usufono see i se isi mea.

Tofa OLO FITI AFOA VAAI: Ia faafetai i lau Afioga, ia o le a faamasino le atunuu i le ma faafinauga.

O le a ou see atu lau Afioga i le Teuteuga o lenei Tulafono, ma e ou te faamalulu atu i lau Afioga leaga o le Tulafono e seasea ona fai i ai ni finagalo o le atunuu ona o le tulaga faigata i le faiga o le Tulafono lenei ma ona suiga.

O le mea lea ou te faamalulu atu ai i lau Afioga i le Fofoga Fetalai ma le paia o lenei Maota, e le o lea se finagalo o Salega Sasae, i le suiga lea ua aumai nei.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Lau Afioga i le Fofoga Fetalai....

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
 – faitauga faalua

FOFOGA FETALAI: Ia se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ua ou tulai atu foi e toe faasao, e faapea e le i faia i ai le finagalo o le atunuu.

O lea sa ou taua atu a, e uma ona tatou soalaupuleina ona faasee lea i le Komiti e gafa ma le Tulafono e latou te faia le vala'auga lautele i le tatou atunuu e afifio mai e faaali ni o latou finagalo, aua o le mea moni lava, o tatou lava o sui o le atunuu. O tatou o sui o le atunuu o faauluuluga lea ua to mai i ai le pule a o tatou itumalo e tatou te faaalua ai finagalo o tatou itumalo. A faapea la e le i palota le itumalo ia te oe, ae na sau lava oe i lou malosi, ia ona sao lea o le saunoaga. A o le atunuu a lea ua i totonu o le Maota. O lea ua faaalua finagalo e avea ai tatou ma sui o le atunuu, o le atunuu lava lea.

FOFOGA FETALAI: Malo. Masalo o lea ua manino. E fesoasoani atu, e mafua ona soso atu le Nofoa, ona e talu ai, mo le silafia e sui usufono mamalu uma o le Palemene, e le faapitoa manu i le sui usufono o lo o saunoa nei mo Salega Sasae, e le tuumamaina, ma e le tuuloa e le Malo le faasaoga o se saunoaga a se sui usufono. O lea e fai mai le Tulafono Tumau, e sese loa le mea e oo i ai le saunoaga a le sui usufono, faasao le Malo. O le saunoaga a le sui usufono, e te saunoa lava oe i lou lea finagalo, ae e te le taaofai fua finagalo o isi sui usufono. Aua o lea e le i faia le faaiuga o le tatou mataupu, a o lea ua e saunoa mai o lea ua fai le faaiuga. Leai o lea ua tuu atu, a uma le faitauga faalua, ua e finagalo le sui usufono mamalu, ona tuuina atu lea o le Tulafono Tau Faaofi ma lona Teuteuga i le Komiti. E 90 aso e soalaupule ai ma toe lipoti mai i le Fono Aoa o ona fai loa lea o le finagalo o le Palemene. Pei e faapena le tulaga o le tatou galuega, ae manaia le saunoa pea o oe i lou finagalo aua le taaofai fua finagalo o isi sui usufono. Ia a e taaofai la, e na o oe lava le sui usufono o lena itu, ia na o le tasi, lua, tolu, ia pau ia o sui usufono pei o lea e pei e faapai tau i totonu o le....a o sui usufono mamalu uma o sui usufono o le HRPP. Na ona faamanatu atu lena itu, ese le faapai tau, ese le tuufaatasi, unite. Saunoa mai le sui usufono.

Tofa OLO FITI AFOA VAAI: Faafetai i lau Afioga i le Fofoga Fetalai, o le na tonu lava e taumafai atu. O lea lava ou te tautala au i lou finagalo. Ae ua faalavelave soo mai ma faauilavea le Afioga i le Palemia o lea ou te tautala au. A i ai se taimi, ia ona ia saunoa faasao mai laia. E ui o lea lau Afioga i le Fofoga Fetalai....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, pei lava e le o malamalama le sui usufono, o lea ua alu le tolu Paeaiaga, ae le o malamalama lava i le mea lea, o le mea e sese loa faasao.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
 – faitauga faalua

E sao e fai lou finagalo, ae a sese loa le finagalo, e le mafai ona nofonofō le Malo e tatau loa ona faasao – ma e le o tapuina le faasao, faasao la e i totonu o le tatou Tulafono Tumau, so o se taimi e sasi ai le sui usufono e tatau ona matou faasao. Aisea? Leaga o la e faafogafoga mai le atunuu. Ina ia tosina i faamatalaga sese e avatu i totonu o le Maota, ae tatau lava ona faasao loa i le taimi e sasi ai le sui usufono.

FOFOGA FETALAI: Ia se i tulai maia le sui usufono, masalo ua manino lou le fia malamalama. O lea ua faamalamalama atu, ae saunoa mai.

Tofa OLO FITI AFOA VAAI: Faafetai lau Afioga i le Fofoga Fetalai. Ua leai a se mea, e a pe a se i sao ia se matou mea i se taimi? Ae na o le sese, sese, sese. Ae ui i lea lau Afioga i le Fofoga Fetalai, o le mafuaaga muamua e mafua ai ona le olea se finagalo o lou itumalo. O le mea muamua, e manatu lou itumalo e le o se Teuteuga e taugofie i le atunuu. E manatua foi lau Afioga i le Fofoga Fetalai, a faapea o lea o le a fesui ai ia Ao Mamalu o le Malo i le sefulu tausaga, uma tulai mai lesi sui lesi sefulu tausaga, e faapena ona fesuisui ai ia tatou tupe, pe afai o le tulaga lena o le tuu o se ata o se Ao Mamalu o le Malo i luga o tatou tupe. O lea e i ai faamaumauga a le Central Bank i le taugata o mea ia, o lea pei ona.....le lolomiga mai o tupe mai Peretania po o fea le mea lea e fai ai.

O le mea lena lau Afioga i le Fofoga Fetalai, e ao ai ona tuuafu ia le tofi lea O Le Ao Mamalu o le Malo, ae a faapea e le mafai, ona toe sui loa lea o le faaigoaina O Le Ao Mamalu o le Malo, ae tuu i ai se Kovana Sili po o le a se tulaga faapena.

O le mafuaaga lau Afioga i le Fofoga Fetalai, ona o lea ua le na o Tama Aiga lea e ofi atu i le vaega lea, o so o se isi lava. O lona lua lau Afioga i le Fofoga Fetalai, o le faatapulaaina o le tofiga lea O Le Ao Mamalu o le Malo, e lima po o le sefulu tausaga, o le umi foi lea lau Afioga i le Fofoga Fetalai, ona tatai faaia a matau le tofa O Le Ao Mamalu o le Malo. Ona o lea ua manino nei i le Tulafono, e leai sana faaiuga e faia se i vagana, ua avatu se fautuaga a le Afioga i le Palemia ma le Kapeneta. Ia ou te le iloa la po o le a le tutoatasi o lena mea. A o lea foi la e manino i le fuaiupu e 26, a faapea e tuu atu se mataupu O Le Ao o le Malo e na te saina mai totonu i le fitu aso. A oo ina le saina le vaega lea, e i ai le malosiaga a le Afioga i le Palemia e na te faatonu ai le Failautusi a le Kapeneta e saina e tusa la pe le fia saina, pe le fia ioe foi i ai Le Ao Mamalu o le Malo e na te faamaonia se mea ua tonu ma sao. A o le fesili lau Afioga i le Fofoga Fetalai, o le a le galuega a Sui o le Fono a Sui Tofia o lea e tatou te faalupe o Sui Ao o le Malo? Ua ta le iloa po o ni Sui Ao, po o ni Sui Faaleoleo. Pe o se avanoa e retire i ai sui o se Faigamalo o lo o pulea le Malo? O le mea lena ou te fia malamalama i ai i le vaega lea.

Lau Afioga i le Fofoga Fetalai, o mafuaaga na e teena Salega Sasae le Teuteuga lenei, ona e mautinoa e le o taoto lelei le Teuteuga faatasi ma le Tulafono lenei i se taotoga talafeagai, amanaia, aloaia ma mamalu.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

O le fautuaga lau Afioga i le Fofoga Fetalai, matou te manatu lava ia tuuafu le tofiga O Le Ao Mamalu o le Malo, ia ma togi uma atu o le afa ma le moa i le tofiga O Le Ao o le Malo e faatino lana galuega i le tutoatasi, ae le o le mea lea e i ai nei. O se fautuaga lena, ma se motugaafa foi lena a lenei itumalo, e puupuu lava e tau ina faataatia atu i tafatafa o lau Afioga ma le Afioga i le Palemia, ia ma le 47 lea na lagolagoina lea Teuteuga. Ma le faaalalo, faafetai.

FOFOGA FETALAI: Malo faafetai. Ia e i ai se isi sui usufono e fia saunoa, a leai o le a...Se i tuu atu le avanoa i le sui usufono lea mo Faasaleleaga Nu. 4.

Afioga PESETA VAIFOU TEVAGAENA (Faasaleleaga Nu. 4): E momoli le faamalo ma le faafetai i lau Afioga i le Fofoga Fetalai, e momoli foi le faafetai i lau Afioga i le Palemia. E ui lava sa feagai ai lau Afioga ma siiga gasegase, ae talitonu sa tapuai tatalo lo tatou Malo ma le atunuu. O lea ua toe foi mai i le atunuu le siiga gasegase a lau Afioga, faafetai. E maitauina ma le totoa, o lea ua toe faafoi le malosi.

E momoli foi le faafetai i Minisita o le Kapeneta, aemaise sui usufono mamalu uma o lenei Maota. E faafeiloai atu foi i Faauluuluga o Matagaluega ma Faalapotopotoga a lo tatou Malo, a o le tapuaiga foi a Samoa ma le tapuaiga a si ou itumalo. O lenei taeao, e momoli le faafetai a lou nei sui usufono, ona o lenei Tulafono Tau Faaofi o Teuteuga o le Faavae (Nu. 3) 2017. O se Teuteuga e le i faigofie pe a fua foi i le Faavae sa tapenaina e o tatou taitai ua fai i lagi lo latou folauga, e le i faigofie. Sa feagai ma le vaofilifili le afutoto ma le afuliligi, ma le toto masaa le sailia o le Saolotoga o Samoa ma ona tagata. O lenei ua faafofoga le Palemene i le saunoaga a le Afioga i le Palemia, ua manino foi ma malamalama. Atonu foi o lea ua faafogafoga le mamalu o le atunuu, ina ia manino mea uma i le tatou Faavae. O lenei Teuteuga, ua matua lagolagoina e lou nei sui usufono ma lou itumalo le sefulu tausaga o lea ua i ai lenei Teuteuga aua le filifiliga o se tasi e na te tauaveina lenei tofiga maualuga. Ua uma foi ona faafofoga i le folasaga a le Afioga i le Palemia i lenei tofiga, o le faamaepaepa. O lona uiga, a fua atu i ai i se isi itu, ua na o le faamaepaepa. Pei foi ona saunoa nisi o sui usufono aumai le Afioga i le Palemia, Tulafono e tuuina atu e sainia e le Afioga O Le Ao Mamalu o le tatou Malo. Ae afai foi e i ai se taimi e le mafai ai ona sainia, o lona uiga, e toe foi mai i le malosi i le Afioga i le Palemia ma le Kapeneta. O le fesili la a lou nei sui usufono, o le a la le uiga o lenei tofiga? Tulou o le upu e to ia te au. Pe le o le taimi ea lenei i lenei Palemene e tatou te toe mafaufau ai, tolu tofiga o lo o feagai nei ma le Malo. O Le Ao o le Malo, o Sui Ao ma le Afioga i le Palemia. Pe le i tataua ea ona toe manatunatu le Palemene, ua lava ia se tasi o se tofiga? Ua lava se tasi ona sefe ai lea o tupe a le Malo. Ua tataua ona tatou vaavaai, ave Faa-Palemene, ave Faa-Peresetene, pe toe i ai se tofiga Faa-Palemia, pe toe i ai e tofiga Faa-Sui Ao, ae lafo i le Malo na te filifilia. O lagona na o lenei itumalo.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

O le Faavae lea ua uma ona taoto. Fai mai le Faavae o Samoa, “E Faavae i le Atua Samoa.” Fai mai le upu a le Perofeta o Isaia mataupu 42 fuaiupu e 8, ‘o au o le Alii, o lou igoa lea...

FOFOGA FETALAI: Na ona faalavelave atu lava i le sui usufono mamalu. O ai Isaia lea, le faaiu o Isaia?

Afioga PESETA VAIFOU TEVAGAENA: O le Perofeta a le Atua.

FOFOGA FETALAI: Oi, o le Perofeta. Ia ua lelei.

Afioga PESETA VAIFOU TEVAGAENA: Fai mai le mau a Isaia...

FOFOGA FETALAI: Tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ona o lau Afioga foi o le Tiakono Toeaina o le tatou ekalesia i Fasitoo, se se i siaki ane i lau Tusi Paia po o sao lenei mea o lo o aumai.

Tofa Olo Fiti Afoa Vaai: Lau Afioga i le Fofoga Fetalai o se mea e fia faasao.

FOFOGA FETALAI: E leai se mea o le a faasao ai, e le o saunoa atu i lau Afioga le sui usufono....

Tofa Olo Fiti Afoa Vaai: E leai se Perofeta e tau o Perofeta a le Atua, na o Isaia ea na e i ai?

FOFOGA FETALAI: O le Perofeta a le Atua Isaia? Malie ia le sui usufono e faapuupuu mai lau saunoaga. E laitiiti lava le tatou Teuteuga o le Faavae lea e i ai ae ua tele lava lou tosoga o le mea i tua. Faapuupuu mai leaga e magumagu foi i galuega a le tatou Fono.

Afioga PESETA VAIFOU TEVAGAENA: Finagalo malie lau Afioga i le Fofoga Fetalai ou te faamalulu atu, OLP, o le Tusi Paia lea o lea e agai i ai le lauga a lenei sui usufono o Faasaleleaga Nu. 4. E le mafai ona aluese le lauga a Faasaleleaga Nu. 4, leaga o le Taiala lea.

Tofa Olo Fiti Afoa Vaai: Lau Afioga i le Fofoga Fetalai, o le a faasao le mea lea e saunoa mai ai le sui usufono mamalu.

FOFOGA FETALAI: Ia le sui usufono mo Salega Sasae.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

Tofa Olo Fiti Afoa Vaai: E le o OLP lea o OLO, e le o OLP. Ae a faapea foi e OLP, ia e lavea uma ai i taua, aua foi O-Olo, L-Levao, P-Peseta. Faafetai.

FOFOGA FETALAI: Se soia ia e te faalavelave i le lauga a le toeaina. Ia tulai mai le sui usufono mo Faasaleleaga Nu. 4 e faaiu mai le saunoaga.

Afioga PESETA VAIFOU TEVAGAENA: Ia ua lata ona faaiu lau lauga lau Afioga. Leaga e tatau pea ona faauma atu le mau a le Atua, e le mafai ona tuua.

FOFOGA FETALAI: Ia lelei faapuupuu mai.

Afioga PESETA VAIFOU TEVAGAENA: Fai mai le mau, “O Au o le Alii, o lou igoa lea, o lou mamalu foi ou te le avatua lea i se tasi.” Silasila la lau Afioga i le Fofoga Fetalai? A o lea tatou te faaigoaina lenei tofiga o le Ao Mamalu. Na o le Atua lava le mamalu, e leai lava se isi, ua na o le Atua foi le Ao. A le tatou Faavae lea? E faavae i le Atua Samoa. O le mea lea lau Afioga i le Fofoga Fetalai, o le motugaafa lena a Faasaleleaga Nu.4. Ua tatau ona toe silasila totoa le Palemene i se tofiga e tasi e tauavea le Malo. Aua o le mea moni lava, e tele tofiga, a o lea e i le Palemia le power, Palemia mea uma, ua leai la se uiga, leai se uiga. Ae atonu foi o le a tele se tupe a le Malo o le a faasaoina mai ai i nei tofiga. Ma lou faaaloalo lava. Ia manuia le Fono.

FOFOGA FETALAI: Malo faafetai. Ia se i tulai mai lava le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, ua maemaea lava le Palemia Lagolago, o le la Tulafono Tau Faaofi lea e fai nei, sa tatau la ona malamalama i ai le Afioga, na ona ou faatu atu, e tatau lava ona soalaupule pea i tua mataupu a le Minisita ma le Minisita Lagolago ae aua le toe lauga i i ma le umi o le tatou Fono. Faafetai.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e manaia tele lava le finagalo o le sui usufono faatoa faaii nei i tua lona tootoo. O le faalavelave, ua talu lava le faamasinoga a le toalua lea, ua ma le toe feiloai ma le sui usufono nei, e le fia faalogo foi i sau upu. Ua ou fiu lava e fautua e o e soalaupule le la mataupu ae manao lava e o i le faamasinoga. Ia o la e lava ua faali lava lona ia finagalo saoloto, ae manaia tele le fautuaga e tatau foi ona ma soalaupule i se taimi.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
– faitauga faalua

FOFOGA FETALAI: Malo faafetai. Ia o mea ia sa ta popole i ai. A o lenei ua e saunoa mai i le Tusi Paia e uiga i na... o lena e ave lava le lua mataupu i o a o le Tusi Paia foi lena e te uuina. E ui i lea, ia e alofa foi... Lealaipule e le i maea le saunoaga a le sui usufono mo Faasaleleaga Nu.4, malie o lea o le a faaiu. A e fia saunoa ona tuuina atu loa lea o le avanoa. Ae faaiu maia le saunoaga.

Afioga PESETA VAIFOU TEVAGAENA: Lau Afioga i le Fofoga Fetalai, o lea ua uma atu le motugaafa a lenei itumalo faamalo faafetai faamalo tapuai. Soifua ma ia manuia le Fono.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: A o le i nofo i lalo le sui usufono, e i ai lava le mea tele lava lea ou te fia faasaoa. O le mea lea na ia taua ai Faigamalo faa-Peresetene, e faapena le Faigamalo a le Malo o Amerika. Ae le filifilia la e se isi le Peresetene, o lea e i ai i totonu i i mea la ia sa e taua. O le Peresetene, o le Ao lava lena o le Malo, o le Peresetene o le Palemia a lena o le Malo, o le Peresetene o Sui Ao lava na o le Malo o Amerika.

O lona uiga e toafa malosiaga lea e iinei, ae na o le tasi lava le tagata la e umia i Amerika. O lea la na e faapea mai e filifili e le Palemene, e le filifilia la e le Palemene le tulaga lena o le Peresetene o Amerika, e filifili mai e le atunuu atoa. Ae pei o se faasaoga lena, ona o lea sa ou faalogo atu e pei e foliga mai o lea sa talanoa i le Malo faa-Peresetene, a o lea foi sa ou faalogo atu o fai mai le isi sui usufono o le Malo faa-Kovana Sili. E pei o lea e tele lava nai manatu foi lea o lo o tulai mai totonu o le Maota nei, ae le o atoatoa ona aumai.

FOFOGA FETALAI: Malo faafetai. Atonu o lea ua manino le folasaga a le Palemia. E faamalulu atu i le tulai mai o le sui usufono. E aoga saunoaga a sui usufono e faatupu manatu i le lumanai. O lea la ua saunoa atu le Palemia e aoga e faatupu manatu i le lumanai, e le gata i le saunoaga a le sui usufono mo Faasaleleaga Nu.4, ae faapea foi i le saunoaga a le sui usufono mo Salega i Sasae. E aoga e faatupu manatu outou finagalo.

Ae o lo o tulai mai, masalo o le toe saunoaga lea o le sui usufono mo Faleata Sisifo. Lealailipule tulai maia e saunoa mulimuli mo le mataupu lenei. O lea ua maua atu le sui usufono mo Faasaleleaga Nu.2, masalo e mulimuli atu ia te oe le...

Tofa LEALAILIPELE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa. E faatalofa atu foi i e Fonousu a Samoa aemaise le tapuaiga a le Ao Mamalu o le Malo ma le paia o Samoa i ona tulaga faalupe.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

A oo loa ina tagofia le Faavae o Samoa i lou talitonuga, e tatau lava ona fai i ai sou manatu ma sou vaivaiga ona e seasea ona tupu. O se mea foi e tatou te see atu tatou ua uma lo tatou taimi ae tumau pea. O le Faavae foi o Samoa, e le o se Faavae na tusia na o ni tagata toaitiiti po o na o ni tagata faatauvaa, sa tusia e Samoa atoa i ona tulatoa ma ona tupu na malilie autasi i ai. Peitai, ua matua foi le Faigamalo a Samoa o lea ua oo i le 55 o ona tausaga, e i ai foi taimi ua tatau ona toe tilotilo ma tagatagai i ni vaega e tatau ona tumau pea, e i ai foi ni vaega ua tatau ona fesui e tusa ai o lea vaitau i lea vaitau. E faateia foi finagalo o le toatele pe a oo ina sui le Faavae ona e le o se mea e masani ai. Peitai, o se mea talafeagai pe afai ua tusa ai ma le taimi tatau ona faia se suiga talafeagai. I le suiga ua tuuina mai nei i le Maota Fono, na pau lava le suiga lea e aumai, o le suiga i leumi po o le term, ae o le mea ou te faafetai ai, o lea lava e tumau le Faavae i ona tulaga mamalu na amata ia ma mafuaaga na ala ai ona faatuina lea tulaga i le taimi a o atoa Tama a Aiga ma Samoa atoa i le loto mama sa tusia ai le Faavae. I le tulaga lava ia o le tofi o lea e faamanino mai lava i le amataga i le Faavae e leai se suiga, o se tofiga faamalumu. E manino lava ma e leai se suiga o i ai, o se tofiga faale Malo, e le o se tofiga faaleaganuu. Tolu, e le o se tofiga e le o aumaia ni aiaiga e faapitoa i se vaega o ni tagata po o ni nai tagata. E manino lava le Faavae o le tofiga mo so o se tagata ua talafeagai ma agavaa i ai.

O le tofiga lea O Le Ao o le Malo i lou talitonuga pe a faatusa i Faigamalo Temokarasi o lea e aumai ai mafuaaga ma tofiga nei, o se tofiga ua ave i se tagata ua maea po ua ritaea mai sana galuega, ua maea lana tautua, ua iloga lana tautua faatino i totonu o le atunuu ma sona sao, ona pei lea e ave i ai se tulaga faamalumu ai po o se faaeaea foi ma faamalumu ai i totonu o faigamalo. E pei o mafuaaga ia i lou talitonuga e faatino ai e nisi atunuu. Ae talu ai ona o tatou ma le tulaga o le tatou Faavae ma le tatou atunuu o lea faatoa 55 tausaga, atonu o le taimi lea faatoa tulai mai ai ma faatino ai le tulaga lea, i lou la talitonuga ua talafeagai le taimi e tatau ona toe iloiloi ai le tofiaina ma le faatulagaina e tatau ona i ai. E faamalumu atu ne i peane ona o le mafuaaga lea foi na ou faalogo i ai i nisi o sui usufono i lenei taeao e faapea a uma lea Tama a Aiga mei ane i lea Tama a Aiga, vaeane le faafogafoga mai a... E leai ma se agaga faapena na i ai i le tusiga o le Faavae, ma e leai foi se agaga faapena o suia ai i le taimi nei se finagalo o i ai tatou. Pau o le mea lea ou te fia fai i ai sou manatu, afai la ua tatou tilotilo i le suiga o le Ao o le Malo i lona term, e tatau foi ona tatou tilotilo i Sui Ao aua leaga e o faatasi mea nei. Afai ua i ai le faamoemoe pe lima tausaga lua term o le Ao o le Malo, ou te talitonu, e tatau foi la ona lavea ai ma Sui Ao i le vaega lea. E le gata i lea, ou te lagolagoina le saunoaga pei ona faatoa mavae atu nei, e tatau foi ona tagai i le agai i luma, vaeane foi le faafofogaaga pe a maea nai tama ma toeaiaina o i ai nei, ua tatau ona tuu i le tasi, tasi Le Ao o le Malo, tasi le Sui Ao.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
– faitauga faalua

E i ai lava lou talitonuga o le suiga lena e tatau ona i ai mo le agai i luma. Ae le gata i lea, o mea ia o tofiga faapenei ma faigamalo faatemokarasi i suiga ia pei ona saunoa i ai, suiga o le igoa, atonu o se suiga lea e toe tagai i ai tatou i le agai i le lumanai. E sui sui pea vaega talafeagai, a o lenei taimi, ou te matua lagolagoina le tulaga o i ai.

Na pau lava la lau tuualalo i le taimi lenei, afai o lea ua ona o lea ua i ai foi lenei suiga i lenei taimi ia Tuimalealiifano le Tama a Aiga ua tulai mai, o le a se finagalo i le taimi e toe faalua ai pe talafeagai pea le toe palota i le lima tausaga, pe le talafeagai ona ave i ai o se feau po o se tusi afai lava o malosi, ia e toe faaauau atu ai aua toe pau lena ma le toe tau palota foi. O lou lea vaivaiga mo le agai i luma, o suiga lava ia talafeagai mai lea taimi i lea taimi, ae ou te matua lagolagoina le tulaga o le Tulafono ia ma le faamalosiua ia tatou, e leai se suiiga i le tulaga mamalu o tofi ma le tulaga o i ai i latou ua filifilia aua e le faapitoa i nisi. Na pau lava le mea lea ua ou fiafia ma tatou vaavaai i ai, o le tulaga o le umi ona tulai mai po o le term, e le gata i le Ao o le Malo, ae toe faamanatu atu le vaega lea Sui Ao.

Ia, ma le faaaloalo lava. Faafetai.

FOFOGA FETALAI: Malo faafetai. E faamalulu atu i le sui usufono mo Faasaleleaga Nu.2, masalo o le a maua lou avanoa pe a tatou toe taliu mai le tatou malologa masani. Ona o lea ua tatou taunuu i le tatou malologa masani, o le a faataatia ese Galuega a le Fono Aoa mo lana malologa masani e 15 minute.

Na faataatiaese Taulumaga a le Fono Aoa mo lana malologa masani i le itula e 10:43 i le taeao ma toe faaauau i le itula e 11:26.

Na toe faaauau Felafolafogaiga i luga o le faitauga faalua o le Tulafono Tau Faaofi o Teuteuga o le Faavae (Nu.3) 2017.

FOFOGA FETALAI: Ou te faasilasila atu ua toe amatalia nei Taulumaga a le Fono Aoa Faitulafono.

Ua ou manatu ua matu i fau le taliga o le sua e maua ai le faasiliga malosi o le paia o taitai o le atunuu, ma o le a toe faaauau le tatou galuega. Ma o le toe saunoaga lea ou te tapa ma le faaaloalo lau Afioga i le sui usufono mo Faasaleleaga Nu.2. O le toe saunoaga lea mo lenei mataupu.

Afioga PAU SEFO TAUMATA PAU (Faasaleleaga Nu.2): Faafetai i lau Afioga i le Fofoga Fetalai mo lenei avanoa taua ua tuuina ma ii lenei sui usufono. Ua toe taliu mai le mamalu o le Palemene aua galuega fai o lenei aso, maua foi le faamalositino. Ou te tulai atu lau Afioga e fia faaali atu ni nai manatu e uiga foi i le toe Teuteuga o le Faavae.

13 NOVEMA 2017

Tulafono Tau Faaofi o Teuteuga o le Faavae (Nu.3) 2017
 – faitauga faalua

Ia manatua o lenei Faavae sa i ai nisi o sui usufono mamalu o lenei itumalo e toalima ua mafua ai ona ou tulai atu, ae o le isi vaega o lo o i ai foi se tulatoa o lenei itumalo o Namulauulu Lauaki. E pei o le mafuaaga lena e fai atu ai ni manatu ma faaleo atu e uiga i lenei teuteuga o le Faavae pei ona i ai lenei taeao. O lenei Faavae ua tolaulau mai e le Afioga i le Palemia ua tusa nei ma le 57 tausaga pe 55 tausaga. O le Faavae lava sa amata mai ai le tatou Faigamalo seia oo mai i lenei vaitau. Aua o lenei teuteuga o se teuteuga talafeagai mo lenei vaitaimi. E faapena lava le Faigamalo e fesuisuia mai lea taimi i lea taimi. O le manatu sa i ai lenei sui usufono atonu o nei Teuteuga sa tataua ona aumai ia suiga talu ai, ina ia tofia ai le manunu o nisi o le atunuu. Ae peitai ane o lea ua manino lava le aumai e faatino ai lenei suiga i lenei vaitau i le isi Paeaiga i le isi Paeaiga. O le tulaga ua i ai, o lea ua faapea mai, na o le tasi le taimi e tofia ai le e avea ma Ao o le Malo. O lea la ua faamanino mai a faapea e uma le lua ia tofiga e sefulu tausaga, ua manino ai lava i ina ua uma lona taimi. O lea lava ua manino, na aumai i le Teuteuga o le Faavae. Ona ou manatu ai lea, faafetai i le Palemia aua o le mea lea sa le mau manatu i ai lou nei sui usufono, ona o le lē malamalama. Aua a i ai se isi e tofia i lea tofi, a tofi ma ua mautinoa a uma lava le taimi lea pe lua ia o ta terms, ae ua iloa ta te le toe maua le tofiga lea. Faafetai i le Malo e tusa ai foi mo lenei teuteuina, ua matagofie ma lelei. O nisi vaega faapea o le faaaogaina O Le Ao o le Malo, o le a i ai foi nisi teuteuga aua atonu foi e i ai nisi tofiga, pei foi ona faapea mai le Palemia o le Peresetene ma le Kovana, atonu foi e i ai nisi teuteuga i lena vaega. Ae o le taimi lenei i le tatou Paeaiga, o lea lava ua manino e sefulu tausaga a lea o le tofiga ona maea lea.

Ae avatu ai le faafetai tele i le toe taliu mai ai o le Afioga i le Palemia. O tatou tatalo lava ia ua toe manuia ai le toeaia, aemaise foi o le tatou vaalele o lea o le a faataunuuna, ae faafetai. Masalo ana tatou le faamaamulu i lea taimi i vaalele faapenei ai ua sefululua pe sefululima a tatou vaalele ua i ai nei. Ae talosia ia, po o lea tausaga ae tautuana ma tatou pasese, aua o la lava e leai se suiga o tatou pasese. Tuutuu laitiiti i lalo, o lea tausaga aumai se isi vaalele e faalua ai. Tatou sailia ni vaalele, si tamai atunuu ae maua ni tatou vaalele se sefulu i la tatou Paeaiga lenei.

Lau Afioga i le Fofoga Fetalai, e faaleo atu lou matua lagolagoina lava o lenei Teuteuga o le tatou Faavae. Manuia le Fono.

FOFOGA FETALAI: Malo faafetai.

Afioga Tapulesatele Mauteni Tamasone Metuli II Esera (Vaisigano Nu.2): Lau Afioga i le Fofoga Fetalai....

Afioga Faumuina Asi Pauli Wayne Fong (Itumalo Tu Taulaga Sisifo): Lau Afioga i le Fofoga Fetalai....

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

FOFOGA FETALAI: Faamalulu atu le sui usufono mamalu ua maea ona fai lau faaiuga. Ae manatu foi o lea e ave i le Komiti, ia a o le Komiti foi e foliga e i ai uma oulua i le Komiti. O lea o le a avatu i ai le Tulafono lenei pe a maea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai....

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O lea e matau ua fai lau iuga. Na o se minute lava e tasi e talifuaitau ai i mataupu ia na laga.

FOFOGA FETALAI: Atonu o lea la o le a maua ai ni mea e le o manino. E faamalulu atu ia oulua i uso usufono, aua e te lua toatamai i le Nofoa. O le galuega e tau tulei atu le tatou galuega ma e refer i le Komiti le mataupu lenei. Tapa ma le faaloalo lau Afioga i le Palemia.

Susuga Hon TUILAEPA AUFLUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faafetai atu i lenei taeao, i le tofa saili e pei ona saunoa i ai ia sui usufono. Ou te le i manatu e oo ia felafolafoaiga i isi foi faigamalo ma a latou foi faigamalo ua filifilia. Lea e pei ona aumai manino e le Afioga ia Levaopolo. Ou te manatua lava le suafa lena e pele ia te au. O Levaopolo ma le Afioga ia Peseta, i le eseese o faigamalo. O le Faigamalo lava lea ua filifilia e tatou tuua o le Faigamalo Faapalemene. E tietie mai ai i luga Le Ao o le Malo e faamalumu e faamaepaepa, ae ese lava le Taitai o le Malo faapea foi ma Faamasino Sili aua le Faamasinoga, ma le Fofoga Fetalai aua le Palemene, e pei o o Lala ia e tolu e fefaatauagai. O lona uiga e agai e le isi lala le isi lala i le tulaga o faigamalo manino, e leai ni mea alualua e tulai mai ai. O le a le faaletonu o le Faamasinoga, e fesiligia e le Palemene lenei, e pei foi la ona lotea i totonu o le tatou Maota ma faatu le Komiti Faapitoa e susesueina galuega a le Faamasinoga. E faapena foi ona talau i le faamasinoga tatou pe a soli le tulafono. E faapena foi ona gaioi lo tatou Malo e molia ia ni lala ua faaletonu. E faapena le tau fai agai o vaega eseese, o lea l e alu ai tatou. Ae ua faateia au ona o le mamao o le mea ua oo i ai le faatofalaiga i lenei taeao, i le ono vaavaai o tatou i Malo Faakovana Sili po o Malo Faaperesetene. Pe a toe tomanatu, o Tutuila e mulimuli i le faa-Amerika, e tofi aloaia, o lea sa ou faalogologo atu o saunoa manino mai ai le sui usufono mai Faasaleleaga Nu. 3, i le tulaga i le tofi sao mai e tagata palota.

13 NOVEMA 2017

**Tulafono Tau Faaofi o Teuteuga o le Faavae (Nu.3) 2017
– faitauga faalua**

O lona uiga e le toe i ai se gaoioiga e fai e Maota e lua. O le isi foi la ituaiga faigamalo, a o lea ua avea ma taitai o le Malo po o ua faalupe o le Kovana Sili po o le Peresetene foi, o lea lava ua i ai uma mea ia O Le Ao o le Malo, Sui Tofia, Palemia. E fa mea ia lea e vaevae i ai tofiga nei, a o Malo la Faaperesetene, e tuu uma lava i le faatumutumuga e tasi. Ona sefe ai lea o tupe e pei ona ou tau matau atu lea e agaga i ai le sui usufono. E i ai lava le upu foi lele lea e aumai i le Tusi Paia, a, ‘o le aso ma le mea e tupu ai, there is a season for everything under the sun, i lalo o le la.” A o le tofa paia a le atunuu, o le taeao ma le filiga o le taeao ma le mataigatila o le fuata ma le lou. Masalo e aumai lava e le Atua le mamoe e osi ai le taulaga ma le taimi e fai ai. O lona uiga, atonu o nisi Faigamalo i le lumanai, mafaufau i ai ma faatino ia mea. A o le taimi nei lava ia o le faatofalaiga lea ma le musumusuga lilo lea a le Agaga Paia o lea ua tuu atu i le vaega toatele lenei latou te faatinoina lenei foi fuafuaga lea ua aumai i ai le tofamamao foi e lagolago i totonu o le Maota lenei. A o lo o i ai lava le avanoa foi e toe sailiili ai ma toe faaali nisi manatu i le taimi e faasee atu ai le Tulafono i le soalaupuleina e le Komiti Faapitoa a le tatou Palemene. O le mea lea sa aumai i le tulaga o le tupe, e faavae ai le tetee foi o se sui usufono. O le mea moni lava e vaivai tele lea taofi na aumai. A outou tepa taulai i le tupe foi lea aupito taulia a le lalolagi le \$ Amerika, o la lava e aumai Siaoisi Uosigitone o ia lena le uluai Peresetene o Amerika na i ai i le faatuina o le Malo. O lona uiga e le o se mea matuia tele lea mea. A oo foi i se taimi e te tulai mai ai, aua e le iloa aluga o aso. Afai lava ua filifili oe e le Atua e avea ma Taitai o le Malo i se taimi. E mafai lava ona e sau foi oe tuu i ai lou igoa i totonu ma faatumau ai pea lou ata e oo i le faavavau. E le o se mea la e afaina ai tofiga e pei ona aumai ai nisi foi o faasea. E i ai le manatu faapea o le a le tutoatasi ai ia Le Ao o le Malo, o le mea moni lava e te fiu lava e faatutoatasi se Ao o le Malo, na te le faatauaina ia mea o le tutoatasi. E faapena e gasegase lava i le lēfia tutoatasi. Ae o lo o i ai i totonu o le Palemene taitai ia e limasefulu i le itu lea, le tofamamao e tofia ai le tagata e le aafia gofie i ia mea. Ina ua faapea o le a le tutoatasi ai ia le sui ona o taimi ia ua faatulai atu. E pei e atagia ai i ina le lē faatuatuaina o le tofa i sui usufono o le Palemene lenei ma tagata e tatau ona tofi. E tatau ona tofi i ai tagata e le amioleaga faapena, ae tofi i ai tagata amiolelele. O le tulaga foi lea sa aumai e le sui usufono mo Faleata e i ai foi itu taua ona o lea ua aumai e ia, e manino le tulaga o le tatou Faavae o lo o laolao ai i le Faavae, ia le lē faapitoa o tofiga i so o se ituaiga tagata. A o ai na faia le Faavae? Na i ai Tamaaiga, na i ai ma sui o tatou itumalo. Pei o mea na e tatau ona silafia lelei, e na o le pau lava le mea lea e agai i ai le fautuaga. Na o le taimi, na o le umi o le taimi, afai ua tofia, ave le faafetai i le Atua ua tofia mo le uluai lima tausaga, afai foi ua toe maua se faaopoopoga, ave le faafetai i le Atua aua o lea tatou te talitonu, o le a le umi o le taimi, e le o so tatou poto e fai ai a o le musumusuga lilo mai le Atua.

Lau Afioga i le Fofoga Fetalai o le toe faaopoopo atu lena.

Na faamaonia le lafo ma faitauina le Tulafono Tau Faaofi o Teuteuga o le Faavae (Nu.3) 2017 i lona faitauga faalua.

13 NOVEMA 2017

Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017 – faitauga faalua

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Tulafono Tumau, Mataupu tau Faiga Palota, Talosaga ma Tofiga Faale Faavae mo le iloiloina ma toe lipoti mai i le Fono Aoa o le maea ai o le 90 aso talu ona tuuina atu le Tulafono Tau Faaofi.

TULAFONO TAU FAAOFI O TEUTEUGA O LE TULAFONO O GALUEGA TINEI MU MA FAALAVELAVE TUTUPU FAAFUASEI 2017 – faitauga faalua

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo Pisinisi ma Alamanuia, Minisita mo le Faalapotopotoga o Tagata Tafafao Maimoa mai Fafu.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e puupuu lava le Tulafono ma e manino foi lona mafuaaga. O se mea matautia le afi lea na mu ai le tane suauu. Sa tuu fesili i le atunuu ma le Malo pe mafua i se a? A o fea o i ai le malosi faafuimu. Masalo e manu e mu uma le taulaga pe ana faapea o le penisini, a o le laki o tatou o le suauu kiso lea e i ai i totonu. Ia ma e na fai fai lava suesuega ma aumai ai faamatalaga i le Kapeneta ma aliae ai, e leai se puipuiga o i ai i le Tulafono e taofia ai le alu atu lava o le tagata ia i lalo o le faatonuga a se Kamupani uelo le tane i so o se taimi, o le taua ia o le vaega lea. Ma e i ai lava le talitonuga ana faapea e tulai mai le mea lea a o le penisini, masalo e salalau le mu, e mu uma le taulaga. E le gata i lena, ae o le lē lava o meafaigaluega e faatino ai pe a tupu mai se faalavelave tele faapenei. O le finagalo la o le Kapeneta ma le vaega faaupufai lena, e le tatau ona faatafagalua ma tuu ai pea le mea lea, aua ne i tatou faatalitali se i tulai mai se isi faalavelave, ae o tatou o tonu lava i le faapogai, e lelei le puipuia na i lo le togafitia. O le ala lena na sailiili sailiili ma latou foi o lo o faauluulu i ai le Pulega, ona taunuu ai lea i le vaega lea, ina ia matua tapu lava ni galuega e toe fai e uelo, o le a le ituaiga uelo e faaoga, se i muamua ona avatu se pemita mai le Fuimu, e faigata tele ona faatino se galuega mo le puipuiga, pe a leai se pemita e avatu muamua i le Fuimu, ma e aumai loa la le talosaga, ona faatoa maua loa lea o le avanoa i le Fuimu e o atoa ai e matua siaki ma pasia atoa le galuega o le a fai o se galuega e le tupu mai ai ni faalavelave i totonu o le tatou atunuu.

13 NOVEMA 2017

Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017 – faitauga faalua

O mea ia e tutupu i lo tatou soifuaga, a tatou vaai loa i le mea le faalavelave e tupu, o le mea e tatau ona fai e le Malo, o le faataoto loa o fuafuaga mamao, ia aua, aua, aua ne i toe tupu mai se mu maoae faapenei i le lumanai.

Lau Afioga i le Fofoga Fetalai, o le mafuaaga lena e le toe mafai ona toe fai ai e se kamupani, po o ai lava le kamupani se galuega faalilolilo e toe uelo, e faapena foi ma faasalaga o i ai, pe a le muai avatu le ioega a le Fuimu ina ua uma ai, ona latou asia pe talafeagai se galuega o le a fai. Ia ona faatoa mafai ai lea ona faatino se galuega fuafua. Lau Afioga i le Fofoga Fetalai, ia o le Teuteuga manino lena o le Tulafono.

FOFOGA FETALAI: Malo faafetai, ia ailoga e i ai ni sui usufono e fia saunoa i lenei mataupu.

Ia se i tulai mai ni sui e fia saunoa se i fua i ai ni tatou galuega. Ia malo. Ia pau lea o le sui usufono o le sui usufono mo Faleata Sisifo.

Tofa LEALAILEPULE RIMONI AIAFI: Faafetai e lagolagoina e le sui usufono le Tulafono Tau Faaofi lau Afioga. Pau o le mea i le Tulafono lau Afioga e fia manino ai, ona o lea e pei o lo o aumai tuutalalalo le Tulafono o so o se ituaiga galuega lava faapenei. E tatou te manao uma e puipui le tulaga na tulai mai tai i le pamu penisini, peitai ne i te i ua afaina ai le tele o galuega aua o lea ou te vaavaai atu i ai, ia manatua foi isi tagata tatou inisinia taavale uelo, o latou galuega e fai i aso uma aso uma. Po o le uiga o le Tulafono o taimi uma e faatino ai le galuega lea e aumai ai le faatagaga a le Ofisa o le Fuimu, pe sa faapea? Ina ia faapitoa ua na o ni galuega tetele e aafia ai le Public Safety, galuega tetele a le Malo po o tulaga faapea, ia ae ona o lea e le o manino mai i le Tulafono, pau lava le faamatalaga lea e aumai, so o se ituaiga galuega uelo.

O le mea lea e fia malamalama i ai ma le faaloalo lava.

FOFOGA FETALAI: Malo faafetai, masalo o le a manino i se saunoaga a le Minisita po o le Afioga i le Taitai o le Malo, e tusa ai o lau faafesili aua e pau lava lea o le saunoaga, ia o lea e tasi ae afe le uiga o le saunoaga a le Sui mamalu. Ia o le a faapupula.

Susuga Hon Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ia ona o lea ua manino le mataupu, ia o lea e ese lava lau faamatalaga ma le faamatalaga na fai atu i le tatou semina foi lea aa faamalamalama ai ia Tulafono. Ia ma o le faamatalaga foi, o le tulaga lava lena, e i ai le upu foi lele, 'e lelei le mao i mea lelei'. O lea foi la e faalautele ai ia le Tulafono, e le o faapumoooina ia le faaupuga o lea e faalautele, ona e i ai le tulaga e ono tulai mai ai se mea tatou te le o mafaufauiina i le taimi leni ae o lea e faalautele le faaupuga, so o se mea e tulai mai ai se afi, a o lea e fia fai ni galuega faapea, tapa muamua le ioega a le Fuimu, i le latou o atu muamua e siaki, ia ma pasia ai.

FOFOGA FETALAI: Malo faafetai.

13 NOVEMA 2017

**Tulafono Tau Faaofi o Teuteuga o le Tulafono o Tulaga Mamalu ma
Faailoga Taualoa 2017 – faitauga faalua**

Na faamaonia le lafo ma faitauina le Tulafono Tau Faaofi o Teuteuga o le Tulafono o Galuega Tinei Mu ma Faalavelave Tutupu Faafuasei 2017 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le latou iloiloaina ma toe lipoti mai i le Fono Aoao i le maea ai o le 90 aso talu ona tuuina atu le Tulafono Tau Faaofi.

Ia o nai avanoa na o lea lava e maua e sui usufono mamalu ia aemaise foi o le faafofoga mai o Samoa ma le atunuu.

**TULAFONO TAU FAAOFI O TEUTEUGA O LE TULAFONO O
TULAGA MAMALU MA FAAILOGA TAUALO A 2017
– faitauga faalua**

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017 i lona faitauga faalua ma ou te fia tautala faamalamalama i ai.*

Faaluaaina e le Minisita mo Pisinisi ma Alamanuia, Minisita o Tupe ma le Minisita mo Aoga, Taaloga ma Aganuu.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ua fai sina leva o le tatou Tulafono lenei, ma ua i ai le manatu o le Malo e tatau ona toe teuteu. Ou te manatua le Tulafono lenei na amata faatalanoa i le tausaga e 1984, ia ona oo mai lea i le tausaga e 1985, ia ma amata faatino ai. Ma o le mafuaaga na fai ai le Tulafono lenei, se i maua se faiga faavae e mafai ai ona honour, ona ave se faaaloalo a le Malo e ala i Pine Taualoa i ai latou ua iloga lo latou tautua i lo tatou atunuu. E faapei foi ona fai e isi Malo, o i latou ua maoae le tautua e ala i taaloga, e auala i a latou tautua faa-Professionals i le tomai ua latou umia. Ia po o isi foi tulaga e i ai ia fesoasoani i taimi o puapuaga.

O lo o mulimulitui a la tatou Tulafono i taiala o lo o faatino ai e isi foi atunuu ia latou Tulafono faapenei. Ae tau mai i le taimi lea, peiseai na o le pau lava lea o le tulaga sa tatou i ai e faaalua ai ia ni tulaga faaaloalo ma le amanaia o i latou ua taualoa pei sa lilifa i ai latou mai fafo. O lea la na amata mai i le faiga lea e fai ai o le to i ai o latou matai faavaomalo, ou te taua o matai faavaomalo aemaise latou e le o ni matai Samoa, ona o suafa matai ia, e le aafia i a tatou Tulafono o Fanua ma Suafa.

13 NOVEMA 2017

**Tulafono Tau Faaofi o Teuteuga o le Tulafono o Tulaga Mamalu ma
Faailoga Taualoa 2017 – faitauga faalua**

O mo mea o honours, e mafai lava la ona faaee i ai se suafa matai, fai ma lona tusi e tusia ai i lalo o lea ua to atu lou matupalapala e aloaia ai lau tautua mo le Malo o Samoa, pei la na o le pau lena o le mea na oo i ai lo tatou mafai. E oo mai la i le taimi lenei, e i ai lava isi e manao e fai ni o latou suafa matai. Ia a o lea lava la e alu i lalo o le Tulafono lena Faavaomalo e le aafia i a tatou faaaloaloga foi ia o i lalo o le Tulafono o Fanua ma Suafa. Ae mo sina faataitaiga, a o ou i ai i le Fono a le Malo Afaatasi, na alu ane ai le isi tagata fai mai, 'o au lenei lea sa ou taulamua e uunai le Malo Afaatasi ma ua latou talia nei le aso faapitoa mo faleui i le lalolagi.' O le mafuaaga ua gauai i ai ia le Malo Afaatasi, ona o le toatele o aiga i le lalolagi, e leai ni o latou faleui, ma e ova i le 30miliona ea tagata o fanau e maliliu i le lalolagi atoa aemaise atunuu tau atiae, ona o le leai o ni faleui. Ia o le ala la lea, ua togia ai e le Malo Afaatasi le aso faapitoa mo faleui o le lalolagi lea pei lava o le aso 19 lea ua i ai nei, le aso 19 o Novema, ae faasalalau atu foi la e le Malo lea ua tatou i ai foi i ina. Ia ona ave lava lea i ai o lau faafetai. Ou fai atu o ai foi lou igoa? Ae fai mai ia ia le tala a si alii lea, 'o lou igoa lava lea ua faaigoa ai nei au ae ua tiai lou igoa sao, a o au lava lea ua faaigoa o Falevao i le lalolagi.' Ou fai atu, 'Sole, ua e fai mai tonu lava i le matai o le nuu o Falevao i Samoa o lona uiga e tutusa taua, ae a pe a e toe alu e fai se isi ou matai i le matou nuu. O lau lava tala faatama, ae ua ou te i i le isi aso ua tu fai mai ua ou sau e fai lou matai, ona ou lau loa lea fai lona igoa matai. O le igoa matai o Tuifalevao, ia na maua lava si a matou meaalofa mai si alii, na manuia ai le matou nuu. Ua ou taua atua lea mea, ona o le taua foi lele o mea nei o le amanaia o tagata lea na faatu ai le Tulafono lenei.

Ia o lea la ua i ai le taofiga foi e tataua ona toe tilotilo e toe teuteu, lea la a silasila i ai, ua aveese le tuu vaega o mo mea o suafa mo sina faataitaiga, leaga a pei a tuu vaega, ona pei lea e first class le isi, second class le isi, e leai se isi e manao uma tagata e fia nofo i le first class pe a e lele i le vaalele. E pei la o le tasi lena mea, lea e mafua ai ona fai Teuteuga, ia atoa ma le malosi ina ia mafai ona tauaoina ia faaaloaloga mo i latou ua fautuaina ia ni galuega lelei sa fai ae ua maliliu consumers, o le ala lena lea e i ai le Teuteuga lenei lau Afioga i le Fofoga Fetalai, ia e faigofie lava ia Teuteuga e le lavelave tele. Ia ma le faaaloalo.

FOFOGA FETALAI: Se i tulai mai le sui usufono mo Salega Sasae.

Tofa OLO FITI AFOA VAAI: Lau Afioga i le Fofoga Fetalai, leai e puupuu lava foi se manatu ma se tulaga e fia malamalama ai foi lou nei sui usufono. Faafetai foi i le Afioga i le Palemia mo le faamalalamalama ma le folasaga manino. Ae o le faafetai i le taua o lenei Tulafono i tau'i mo aga taualoa po o auaunaga foi mo nisi ua loa lo latou soifua tautua i lo tatou Malo.

13 NOVEMA 2017

**Tulafono Tau Faaofi o Teuteuga o le Tulafono o Tulaga Mamalu ma
Faailoga Taualoa 2017 – faitauga faalua**

Ia o le tulaga foi i le mea lea o matai lea pei ona saunua le Palemia, ou te fia fesili ou te fia malamalama pe o lavea ai la ma isi tagatanuu mai fafo po o foreigners ia lea e faamatai foi i tua, i le Tulafono la lea e te saunua i ai o le Tulafono e na o sina mea foi lele e faamaepaepa ai. Pe o le mea ua lavea tonu ia Tuifalevao i lalo o le Tulafono lea o Fanua ma Suafa?

O le popolega lau Afioga i le Fofoga Fetalai, o le tulaga lea o....

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e sili ona ou vave tali atu, e leai se mea faapena o i ai i totonu o le Tulafono. A tatou talanoa i le mea lena o lona uiga ua tuu le Tulafono ae talatalanoa i mea ese. E leai lava ma se mea faapena o i ai i totonu o le Tulafono.

Tofa OLO FITI AFOA VAAI: Lea na ou talanoa atu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Leai ua ou taua mea ia, e pei o tatou lava aga, o tatou lava aga faavaomalo. O le mea lava ua leva, lea e alu ai lava tatou, ae e le o se mea o le Tulafono.

Tofa OLO FITI AFOA VAAI: O lona uiga la e sese lau faamalamalama lea na aumai, ia faafetai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Leai o le agaga lau Afioga, o se faaitaiga o mea nei sa tatou sau ai, ae le i faia le Tulafono, a. Pe na o le pau lava lena o le mea sa tatou agai i ai i le taimi na sau ai le Peresetene o Nauru e asiasi mai. Ia na fai ai le mea faapena, fai lona igoa matai, ia ona alu lea ma lana sua, ae oso ane le isi faauluuluga o le Matagaluega i Nauru sau loa tala mai ia te au, fai mai ‘Sole, se ou te alu ane o la e fai ma solovae le ietoga matagofie lava memea na avatu iinei i faaaloaloga foi ia. O le mea lena a fai ni mea faapena, aua le faia ni sua i mea faapea. Tai i ai na o sana manufata ona uma ai lava lea, ave i ai ma sana tanoa e nofonono ma tui ai ana fruit juice.

Lau Afioga i le Fofoga Fetalai, o le faamalamalama lena, e pei o le mea lea sa ou taua ai i le mafuaaga na fai ai a tatou Tulafono ona sa leai ni Tulafono faapena, ia ona tatou agai a lea e fai le masani o le fai o igoa matai. O lea la e oo mai nei lava, o la e omai lava ia ou te manao e fai sou igoa matai. Ia lea la na ou faamatai ai si alii lea e siamupini i le lalolagi, ia e pei na o le pau lava lena o le Lupesoliai, na o le pau lava lena o le Samoa ua siamupini i fusuaga o le lalolagi o Lupesoliai mai le nuu o Aufaga.

Ia o le faamalamalama lena lau Afioga.

FOFOGA FETALAI: Ia malo.

13 NOVEMA 2017

Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017 – faitauga faalua

Tofa OLO FITI AFOA VAAI: Lau Afioga leai ou te le faafinau, ou te au i le tulaga e pei ona faamalamalama mai e le Afioga i le Palemia, le tulaga o le faiga ia o igoa matai po o ni pine taualoa i nai tagatanuu mai fafo lea, ae pau lava le mea ou te popole i ai, o le tulaga foi lele aua e leai se pa puipui o ia faamatai faapea i lea Tulafono ma le faamatai foi lea o le tatou Tulafono.

Pe afai nei la aua afai nei e tauva i le palota, o lea e entitle, aua na o le matai lava le mea lea e fia maua ia ona alu foi lea i le palota. Ae o le isi itu lau Afioga i le Fofoga Fetalai, ia o nai sui usufono, Minisita, ia o le Palemia.

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Lau Afioga i le Fofoga Fetalai o se mea e fia faasao, o matai na o lea ou te faalupea i se tulaga faaupuga faa-diplomatic, e leai e le mafai ona o i se palota, e le mafai foi ona faaoga se isi aia e aia i ai le matai Samoa. Ae pau lava le mea la e alu ma ia, o le mea o le mamalu faava o Malo ona alu ai lava lea. O le aoga o le mea lena, o lea ua Palemia le Samoa i Niu Sila, o lea foi ua Sui Palemia Vaovasamanaia Winston Peters o le Samoa. O le tuai lava ona oo mai ia Trumps iinei, e oo mai loa lava foi fai sona igoa matai. O le auala vave lena e tulai mai ai le Samoa e pulea isi atunuu o le ave i ai o sona igoa matai faava o Malo. O mea la na e le aafia i le tatou Tulafono Tau Faaofi lea e fai nei.

FOFOGA FETALAI: Malo faafetai. Ia ua maea le taimi o le sui usufono. Ia malie ia le sui usufono o lena lava e te silafia....

Tofa OLO FITI AFOA VAAI: Malie lau Afioga na o sina vaega mulimuli lava lea faamaea ai.

FOFOGA FETALAI: O lea ua faamanino atu e le Palemia...

Tofa OLO FITI AFOA VAAI: O le tulaga foi lea pei ona ou fai atu i sui usufono mamalu o le Maota lenei, o Afioga i Minisita ma le Afioga foi i le Palemia. Masalo o le taimi lenei, e le o i ai se tulaga taualoa foi lenei pe a maea se tautua. E faapena foi i lau Afioga i le Fofoga Fetalai, e le o manino mai i se Tulafono, o a ni tulaga taualoa a maea le tautua ona i ai lea o se faamanuiaga faapena. E pei o lea ou te tau fesili atu i le vaega lea pe le tatau ona fai se vaega faapena aua o le tele o....

FOFOGA FETALAI: Lafo maia i le Malo le fautuaga...

Susuga Hon Tuilaepa Auelua Fatialofa Lupesoliai Lolofietele Neiote Aiono Galumalemana Dr. Sailele Malielegaoi: Lau Afioga o lea e i ai, ae o lo o i ai se faaupuga, o le tautua maoae, o le tautua lava o le tautua. A o le isi ituaiga tautua e tautua paole. Na o le tautua la maoae ma faamaonia i lipoti, o le ituaiga tautua lena e faapena foi ona agavaa i le Tulafono Tau Faaofi lea. O le tali puupuu atu lena.

13 NOVEMA 2017

Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017 – faitauga faalua

FOFOGA FETALAI: Malo faafetai. Ia malie ia le sui usufono masalo po o lea ua faamalieina....

Tofa OLO FITI AFOA VAAI: Ua lelei la faafetai. O le mea sili o lea ua ou faalogo atu i le tautua maoae. Ae pau lena lau Afioga i le Fofoga Fetalai o se manatu. Faafetai mo le avanoa.

FOFOGA FETALAI: Malo faafetai. Ua manino au o fala i le saunoaga a le Afioga i le Palemia, ua taumafai mai foi le sui usufono, manaia e faatupu manatu foi lou finagalo.

Na faamaonia le lafo ma faitauina le Tulafono Tau Faaofi o Teuteuga o le Tulafono o Tulaga Mamalu ma Faailoga Taualoa 2017 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloina ma toe lipoti mai i le Fono Aoao i le Fonotaga e sosoo ai.

Ou te tapa ma le faaaloalo se lafo mai le Taitai o le Maota.

LAFO MO LE FAATAATIAESE O TULAFONO TUMAU 102(1)

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SSAILELE MALIELEGAOI: Lau Afioga i le Fofoga Fetalai, talu ai ona o le taua tele o Tulafono Tau Faaofi e lua lea ua oo i ai le faasologa o le tatou Galuega, o lea ou te faatuina ai le lafo, *Ina ia faataatiaese Tulafono Tumau 102(1) ina ia avanoa ai le faagasologa o Tulafono Tau Faaofi mo le Kamupani Tausi Mavaega 2017 ma le Tulafono Tau Faaofi o Teuteuga o le Tulafono o Faaputuga Oa Faavae Resitalaina 2017 i lona tulaga faanatinati.*

Faaluaia e le Minisita mo Pisinisi, Alamanuia ma Leipa ma le Minisita mo Aoga, Taaloga ma Aganuu ma le Minisita mo Tagata Tafafao Maimoa Mai Fafu.

Na faamaonia le lafo ma tulai ai Tulafono Tumau 102(1) ua faataatiaese.

13 NOVEMA 2017

TULAFONO TAU FAAOFI O KAMUPANI TAUSI MAVAEGA 2017
- faitauga faalua

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Kamupani Tausi Mavaega 2017 i lona faitauga faalua ma ou te fia tautala faamalamalama i ai.*

Faaluaaina e le Minisita mo Aoga, Taaloga ma Aganuu, Minisita mo Faamasinoga ma Pulega Tau Faamasinoga ma le Minisita mo Tina ma Tamaitai, Atinae o Nuu, Afioga ma Agafesootai.

Afioga Hon SILI EPA TUIOTI: Lau Afioga i le Fofoga Fetalai, o lenei Tulafono Tau Faaofi e sui ai le Tulafono o lo o i ai i le vaitaimi lenei, le Tulafono o Kamupani Tausi Mavaega 1988. O itu taua o lenei Tulafono Tau Faaofi e faapea, muamua, ia suia le Tulafono o lo o i ai nei, ona toetiiti ato le tolu tausaga o i ai ina ia siitia le tulaga o tulafono ma tulaga tau tupe faava o Malo a Samoa ina ia mafai ona ogatasi ma suiga o talutalufou aemaise moomiaga po o faatinoga faava o Malo o lo o nafa ma le maitauina o le puipuiga ma le sololelei o le faatinoga o tupe faava o Malo.

Ma o le naunautaiga ina ia mafai e lenei Tulafono Tau Faaofi ona alofia ma fai ni puipuiga mai le faaaogaina faasolitulafono. Lona lua, o le faaaogaina e faatupe ai faiga faatupu faalavelave. Ma le lona tolu, e alofia ai foi le totogi o ni tupe i atunuu e aumau ai le aufaipisinisi.

O le isi itu taua o lenei Tulafono Tau Faaofi, o le avanoa e mafai ona siitia ai le aofai o laisene e mafai ona ofo atu e le tatou Faalapotopotoga. I le Tulafono o le 1988, e na o le tasi le ituaiga laisene sa mafai ona ofoina atu. Peitai o le Tulafono Tau Faaofi ua i ai nei, e fa nisi auaunaga ua mafai ona tuuina atu. Ua mafai foi i lalo o lenei Tulafono fou ona faapoopoga ni malosiaga i lalo o le pulega a le SIFA e faatino ai ona tiute autu ma le mataitu lelei lea ina ia sololelei pea le faaaogaina o tatou Tulafono ma auaunaga ma ia malupuipua pea le tauleleia o le tatou atunuu. Ma le faaaloalo lava.

FOFOGA FETALAI: Malo faafetai. Ia ua leai se sui usufono e fia saunoa, o le a tuuina atu le fesili.

Na faamaonia le lafo ma faitauina le Tulafono Tau Faaofi o Kamupani Tausi Mavaega 2017 i lona faitauga faalua.

TULAFONO TAU FAAOFI O TEUTEUGA O LE TULAFONO O
FAAPUTUGA OA FAAVAE RESITALAINA 2017 – faitauga faalua

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faaputuga Oa Faavae Resitalaina 2017 i lona faitauga faalua ma ou te fia tautala faamalamalama i ai.*

13 NOVEMA 2017

**Tulafono Tau Faaofi o Teuteuga o le Tulafono o Faaputuga Oa Faavae
Resitalaina 2017 – faitauga faalua**

Faaluaina e le Minisita mo Tina ma Tamaitai, Atinae o Nuu, Afioga ma Agafesootai, Minisita mo Aoga, Taaloga ma Aganuu ma le Minisita mo Faamasinoga ma Pulega Tau Faamasinoga.

Afioga Hon SILI EPA TUIOTI: Faafetai i lau Afioga mo le avanoa. O lenei Tulafono Tau Faaofi e na o ni nai teuteuga ina ia faaleleia atili ai ma manino atili le faatinoga o oa faavae resitalaina e tusa ai ma le Tulafono na pasia ia Oketopa 2016. Mo le silafia o oa faavae resitalaina e aga tutusa ma mavaega po o trusts. Na pau le eseesega e resitala pei o se kamupani ae le resitalaina mavaega. O Tulafono Tau Faaofi o lo o i luma o le Palemene i le aso, o le a fesoasoani tele lea ina ia le gata e tosina mai tagata i tatou tulafono auaunaga a ia faapena foi ona mataitu ma fesoasoani le faaleleia atili o auaunaga a le SIFA ina ia faapea ona mataitu aiaiga ma auaunaga ina ia faapea ona faava o Malo o lo o limataitaiina ai lea vaega o tatou auaunaga faava o Malo ae faatupulaia ai pea tupe maua i ala o lo o tusa ai ma le Tulafono.

E pei ona silafia e le mamalu o le Palemene, o tupe maua mai le kamupani a le SIFA, e tele lona aoga i le faatupeina o le atinae o le tamaoaiga o Samoa ae faapea foi le lagolagoina o le atinaeina o taaloga i totonu o le atunuu. Ou te tuuina atu nei faamatalaga e lagolago ai ma faamalamalama atili ai le Tulafono Tau Faaofi ua tuuina atu. Ma le faaaloalo lava.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faaputuga Oa Faavae Resitalaina 2017 i lona faitauga faalua.

**TULAFONO TAU FAAOFI O KAMUPANI TAUSI MAVAEGA 2017
– iloiloga auiliili**

FOFOGA FETALAI: E tusa ai ma Tulafono Tumau, e amata le iloiloga auiliili i le Fuaiupu 2.

FUAIUPU 2: Faamatalaina o uiga o upu.

Faamaonia.

FUAIUPU 3: Galuega tauave a le Pule Faatonu.

Faamaonia.

13 NOVEMA 2017

**Tulafono Tau Faaofi o Kamupani Tausi Mavaega 2017
– iloiloga auiliili**

FUAIUPU 4: Sui o sui auai.

Faamaonia.

FUAIUPU 5: Faatonuga.

Faamaonia.

**FUAIUPU 6: Faaputuga oa faavae faamaonia mo le faamatalaina o
“kamupani tausī mavaega tumaoti”.**

Faamaonia.

FUAIUPU 7: Tulaga faasaina.

Faamaonia.

FUAIUPU 8: Faamautuina atu o tupe faavae.

Faamaonia.

FUAIUPU 9: Mataituina o tupe faavae ma le tulaga gafatia e totogi.

Faamaonia.

FUAIUPU 10: Inisiua.

Faamaonia.

13 NOVEMA 2017

**Tulafono Tau Faaofi o Kamupani Tausi Mavaega 2017
– iloiloga auiliili**

FUAIUPU 11: Igoa.

Faamaonia.

FUAIUPU 12: Malosiaga.

Faamaonia.

FUAIUPU 13: Kamupani tausī mavaega, ma isi.

Faamaonia.

FUAIUPU 14: Faamalumaluga.

Faamaonia.

FUAIUPU 15: Tuuina atu o malosīaga i le TCSP.

Faamaonia.

FUAIUPU 16: Tuuina atu o malosīaga e le TCSP.

Faamaonia.

FUAIUPU 17: Galue e avea ma sui o kamupani laiti.

Faamaonia.

FUAIUPU 18: Aveeseina mai le tofi.

Faamaonia.

13 NOVEMA 2017

**Tulafono Tau Faaofi o Kamupani Tausi Mavaega 2017
– iloiloga auiliili**

FUAIUPU 19: Faamatalaga tauto a le tagata ofisa.

Faamaonia.

FUAIUPU 20: Malosiaga e avea ai ma sui.

Faamaonia.

FUAIUPU 21: Totogifuapauina, tau faasee atu ma tupe alu.

Afioga ALIIMALEMANU ALOFA TUUAU (Alataua Sisifo): Lau Afioga i le Fofoga Fetalai pe maua se avanoa...

FOFOGA FETALAI: Tulai mai le sui usufono po o le Taitaifono o le Komiti o Tupe.

Afioga ALIIMALEMANU ALOFA TUUAU: E faatalofa atu i lau Afioga i le Fofoga Fetalai faapea sui usufono mamalu o le Palemene, e faatalofa atu foi i le tapuaiga a Samoa o faafofoga mai ia faapea foi lou Itumalo o Alataua i Sisifo.

O le Tulafono Tau Faaofi e pei ona folasia i Maota i le Fuaiupu 21 lea faapea ua agavaa ai le TCSB e faaee atu totogifuapauina ma isi; pe le talafeagai ona i ai ma le vaega lea e tatau ona i lalo o le tatou Tulafono lea na pasia i le amataga o le tausaga nei i fees e grants, ua ou le maua lelei foi le faaupuga, lea e tatau ai ona uia le Revenue Control Board faatoa mafai lea ona tuuina atu ni totogifuapau i le mamalu o le atunuu nai lo le tuusaunoa i le TCSB latou te faae'e atu totogi fuapauina ma isi. Faafetai mo le avanoa.

FOFOGA FETALAI: Malo faafetai. Ia ou te tapa lau Afioga aua o lau Afioga o le Taitaifono o le Komiti o Tupe, ae se i tulai mai pea lau Afioga i le Minisita o Tupe pe i ai sou finagalo e tau faamalalama ai le itu lea pei ona atugalu i ai le Afioga i le sui usufono mamalu mo Alataua Sisifo.

Afioga Hon SILI EPA TUIOTI: Faafetai i lau Afioga i le Fofoga Fetalai, ia faafetai atu foi mo le faafesili. Ia e pei ona silafia o le tatou Faalapotopotoga lea o le SIFA lea e faia le tatou auaunaga faaletupe faava o Malo, o le taimi lenei masalo o tatou le isi atunuu e aupito laitiiti le tatou faalapotopotoga ma le galuega o lo o i ai pe a fuafua i vaega tetele ia e i ai le British Virgin Islands ma Bermuda ma i latou i le tulaga lena.

13 NOVEMA 2017

Tulafono Tau Faaofi o Kamupani Tausi Mavaega 2017
– iloiloga auiliili

O le taumafaiga foi i le suiga o le Tulafono lenei ina ia mafai ona vave, e le gata ina ia manino le Tulafono a o le tulaga foi lea ina ia faatosina mai ai ni kamupani fou e faatele ai ni kamupani e resitala i totonu o le tatou atunuu, ia ma faapena foi ona tele tupe e aumai i totonu. O galuega nei e faatino e kamupani Loia a le atunuu ia faapea foi i latou o lo o Tausitusi, ma e taua ai le tulaga lea mai lea taimi i lea taimi e tatau ona fetuunai le tau o tatou laisene ma tatou pemitia ia e aveatu i ai.

O le tulaga foi o lo o iai nei atonu e faapea e le o aveatu i le tatou Komiti lea o le National Revenue Board ae auala atu ia te au e ave i le Kapeneta e fai ai se fesuaiga i le tulaga lena. O lou talitonuga e taua tele le vave ona faia fetuunaiga ia ma faamanino le faaiuga i ai ina ia faapena ona faatosina mai i latou e faaalogaina tatou Tulafono nei. Ma le faaaloalo lava.

FOFOGA FETALAI: Malo faafetai.

Faamaonia le Fuaiupu 21.

FUAIUPU 22: Totogifuapauina tau pulega.

Faamaonia

FUAIUPU 23: Totogifuapauina o Faatonu.

Faamaonia

FUAIUPU 24: Tulaga faasaina.

Faamaonia

FUAIUPU 25: Filifiliga o laisene esese.

Faamaonia

13 NOVEMA 2017

Tulafono Tau Faaofi o Kamupani Tausi Mavaega 2017
– iloiloga auiliili

FUAIUPU 26: Talosaga.

Faamaonia.

FUAIUPU 27: Faamatalaga faapitoa.

Faamaonia.

FUAIUPU 28: Faamaoniga.

Faamaonia.

FUAIUPU 29: Faia o Lipoti.

Faamaonia.

FUAIUPU 30: Tiute tauave tau tomai faapitoa.

Faamaonia.

FUAIUPU 31: Amioga tau tomai faapitoa.

Faamaonia.

FUAIUPU 32: Faamaumauga.

Faamaonia.

FUAIUPU 33: Puipuiga o faamatalaga faamaumauina.

Faamaonia.

13 NOVEMA 2017

**Tulafono Tau Faaofi o Kamupani Tausi Mavaega 2017
– iloiloga auiliili**

FUAIUPU 34: Faiga faavae tau tupe faaofi mai faasolitulafono.

Faamaonia.

FUAIUPU 35: Asiasiga.

Faamaonia.

FUAIUPU 36: Suesucina o tusi ma faamatalaga tau tupe.

Faamaonia.

FUAIUPU 37: Suesuega.

Faamaonia.

FUAIUPU 38: Isi gaoioiga.

Faamaonia.

FUAIUPU 39: Faalēaogaina o laisene.

Faamaonia.

FUAIUPU 40: Faamaapeina.

Faamaonia.

FUAIUPU 41: Talosaga tetee.

Faamaonia.

13 NOVEMA 2017

Tulafono Tau Faaofi o Kamupani Tausi Mavaega 2017
– iloiloga auiliili

FUAIUPU 42: Fetufaaiga o faamatalaga.

Faamaonia.

FUAIUPU 43: Isi faatulagaga o le galulue faatasi.

Faamaonia.

FUAIUPU 44: Faalafogaina.

Faamaonia.

FUAIUPU 45: Faasalaga tau tupe.

Faamaonia.

FUAIUPU 46: Fuainumera faamaumauina.

Faamaonia.

FUAIUPU 47: Tuusaunoaga.

Faamaonia.

FUAIUPU 48: Taulumaga pe afai ua leai se tulaga e faataatiaese ai.

Faamaonia.

FUAIUPU 49: Tulafono faatonutonu.

Faamaonia.

13 NOVEMA 2017

**Tulafono Tau Faaofi o Kamupani Tausi Mavaega 2017
– iloiloga auiliili**

FUAIUPU 50: Soloia.

Faamaonia.

FUAIUPU 51: Aiaiga tau soloaiga ma aiaiga faasaoina.

Faamaonia.

FUAIUPU 52: Teuteuga faatupulaia.

Faamaonia.

FAAMATALAGA.

Faamaonia.

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Tulafono o Kamupani Tausi Mavaega 2017

Faamaonia.

Na faagasolo le Tulafono Tau Faaofi o Kamupani Tausi Mavaega 2017 e aunoa ma se Teuteuga.

**TULAFONO TAU FAAOFI O TEUTEUGA O LE TULAFONO
O FAAPUTUGA OA FAVAE RESITALAINA 2017
– iloiloga auiliili**

FOFOGA FETALAI: E tusa ai ma le Tulafono Tumau e amata le iloiloga auiliili i le Fuaiupu 2.

FUAIUPU 2: Ua teuteuina e le fuaiupu e 2.

Faamaonia.

13 NOVEMA 2017

Tulafono Tau Faaofi o Teuteuga o le Tulafono o Faaputuga Oa Faavae
Resitalaina 2017 – iloiloga auiliili

FUAIUPU 3: Ua teuteuina le fuaiupu e 12.

Faamaonia.

FUAIUPU 4: Ua teuteuina le fuaiupu e 67.

Faamaonia.

FUAIUPU 5: Ua teuteuina le fuaiupu e 89.

Faamaonia.

FUAIUPU 6: Ua faaofi le vaega 7A fou.

Faamaonia.

FUAIUPU 7: Ua faaofi le vaega 8A fou.

Faamaonia.

FUAIUPU 8: Ua faaofi le fuaiupu 90A fou.

Faamaonia.

FUAIUPU 9: Teuteuga lautele.

Faamaonia.

FUAIUPU 10: Ua teuteuina le faamatalaga e 4.

Faamaonia.

13 NOVEMA 2017

**Tulafono Tau Faaofi o Teuteuga o le Tulafono o Faaputuga Oa Faavae
Resitalaina 2017 – iloiloga auiliili**

FUAIUPU 1 MA LE IGOA:

FUAIUPU 1: Igoa puupuu ma le amataga.

IGOA: Teuteuga o le Tulafono o Faaputuga Oa Faavae
Resitalaina 2017.

Faamaonia.

*Na faagasolo le Tulafono Tau Faaofi o Teuteuga o le Tulafono o
Faaputuga Oa Faavae Resitalaina 2017 e aunoa ma se Teuteuga.*

**TULAFONO TAU FAAOFI O KAMUPANI TAUSI
MAVAEGA 2017 – faitauga faatolu**

FOFOGA FETALAI: Tulai mai lau Afioga i le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai ae le i faatuina atu le lafo, e muamua ona momoli atu le faamalo ma le faafetai i le paia ma le mamalu o le Palemene ona o le lagolagoina o le Tulafono Tau Faaofi ua faataatia atu, ou te iloa e tele le aoga mo i tatou.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Kamupani Tausi Mavaega 2017 i lona faitauga faatolu.*

Faalucaina e le Minisita mo Aoga, Taaloga ma Aganuu, Minisita mo Faamasinoga ma Pulega Tau Faamasinoga ma le Minisita mo Tina ma Tamaitai, Atinae o Nuu ma Afioga ma Agafesootai.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

**TULAFONO TAU FAAOFI O TEUTEUGA O LE TULAFONO
O FAAPUTUGA OA FAAVAE RESITALAINA 2017
– faitauga faatolu**

Afioga Hon SILI EPA TUIOTI: Lau Afioga i le Fofoga Fetalai e toe momoli atu foi le faafetai i le mamalu o sui usufono ona o le lagolagoina o le tatou Tulafono Tau Faaofi.

13 NOVEMA 2017

**Tulafono Tau Faaofi o Teuteuga o le Tulafono o Faaputuga Oa Faavae
Resitalaina 2017 – faitauga faatolu**

E avea foi lenei avanoa e momoli atu ai le faafetai tele ma le faamalo i le Pule Faatonu faapea le aufaigaluega a le SIFA, aua o latou o lo o faatinoina ma faagaoioina lenei atinae taua tele, ioe, o latou foi o lo o matauina o a ni fesuiaiga e tatau ona tatou faia i tatou Tulafono ma faiga faavae ina ia faapena ona ogatasi ma suiga ua faia e le lalolagi o lo o taumafai foi latou ia ina ia faapena ona taofiofia foi ia kamupani faapenei. Faamalo i le Pule Faatonu ma le aufaigaluega. E momoli atu foi le faafetai i le tapuaiga a Tapaau ma Salelologa, ua iu manuia ai foi le talanoaina o lenei Tulafono taua tele.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faaputuga Oa Faavae Resitalaina 2017 i lona faitauga faatolu.*

Faaluaina e le Minisita o Tupe Maua, Minisita mo Faatoaga, Minisita mo Aoga, Taaloga ma Aganuu ma le Minisita mo Faamasinoga ma Pulega Tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.

**TULAFONO TAU FAAOFI O LE FAAFOEGA O TAALOGA ESEESE
TAU TUPE 2017 - faitauga faalua**

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu atu le lafo, *Ina ia faitauina nei le Tulafono Tau Faaofi o le Faafoega o Taaloga Eseese Tau Tupe 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo le Soifua Maloloina ma le Minisita mo Aoga Taaloga ma Aganuu.

Afioga Hon LAUTAFI FIO SELAFI PURCELL: E faamalulu atu i lau Afioga i le Fofoga Fetalai e le o se soli Maota o le sasi lava i le faagasologa foi o lau tilotilo, e faamalulu atu ai i le Maota faapea foi le faafofogaaga a Samoa.

Ae toe faaaauu atu se faamatalaga i le auga tonu o lenei Tulafono, o le taumafai lea ina ia puleaina le tele o taaloga lea ua ofi mai i totonu o lo tatou atunuu. Ua amata ona oo i le tulaga lea lau Afioga ua amata ona le puleaina. O le manumanuga lava o le Malo ina ne i te i ua tulai mai ni tulaga maoae, i le faagaoioiga o nei taaloga ae tainane foi o le aafiaga o tatou tagata ona o nei taaloga tau tupe ua tulai mai, ona faapea lea o lo o nifonono le Malo, leai e le o nofonono le Malo ae sa mataitu ia tulaga o le agai pea o nei taaloga ua tulai mai.

13 NOVEMA 2017

**Tulafono Tau Faaofi o le Faafoga o Taaloga Eseese Tau Tupe 2017
- faitauga faalua**

O lea la ua tuu mai le Tulafono lenei lau Afioga, o le Tulafono foi e faigofie lava pe a silasila totoa i ai i ona tulaga uma lava. O lo o maiio mai lava i totonu i ina tulaga uma lava e pulea tatau ai ia taaloga o lo o faaogaga e lo tatou atunuu. Ia fai ma le atoatoa i lalo o le Tulafono, aua ne i faia ni taaloga faaletulafonoina, ia aua foi ne i aafia le soifua ma le olataga o i latou o lo o taaalo i nei taaloga talu ai le fai faasolitulafono o taaloga e i latou latou o lo o faafoeina taaloga.

O tulaga la lau Afioga, e ono lava vaega taua o le Tulafono lenei, lea e ausia i totonu ia le faamoemoe, ma e faapenei la. O sini autu o le Tulafono Tau Faaofi lenei. Ia faafoe le faagaoioiga o taaloga ma taaloga eseese tau tupe. Lona lua, ia taofia ma faaititia le lamatia e mafua mai i taaloga eseese tau tupe po o le prevent and minimize the harm caused by gaming and gambling. Lona tolu, e faatagaina ai nisi ituaiga o taaloga eseese tau tupe ma faasaina ai foi isi ituaiga o taaloga eseese tau tupe. Authorize certain types of gaming and gambling activities and prohibit other types of gambling and gaming. Lona fa, ia faalauiloa ai o taaloga eseese tau tupe e lelei ona fuafuaina ma e le faaituau. Promote responsible and fair gambling and gaming. Lona lima, faatapulaaaina ai o avanoa mo solitulafono ma uiga le faamaoni e fesoatai ma taaloga eseese tau tupe. Limit opportunities for crime and dishonesty associated with gaming and gambling activities. Ma le autu mulimuli, ia faamautinoaina le faaogaina lelei o tupe e maua mai i ia taaloga eseese tau tupe mo faamoemoega o tagata lautele. Ensure money gained from gaming and gambling is applied to community purposes. O le ono lena o sini autu o le faamoemoe o lea Tulafono lau Afioga. Ma e sefulu ma le fa vaega o lo o i totonu o le Tulafono lenei o lo o maiio mai ai uma lava vaega e tatau i lenei Tulafono. Amata mai lava i le malosiaga o le Matagaluega, malosiaga o le Faatonu Sili aua le faafoga o lenei galuega aemaise foi o le faagaoioiga o le faatagaina ma le lē faatagaina o taaloga e tatau ona fai. O taaloga lava latou ia o lo o manino lava le faamoemoe, na pau lava o le tulaga i le Tulafono lenei o le fai o le pemitā aloaia i lalo o le Matagaluega e talanoa ai tulaga eseese. O lena pemitā ia tausisia foi e i latou o lo o taumafai e fai se taaloga, o latou uma foi e tatau ona apalai mai o lo o i ai uma i totonu o le Tulafono Tau Faaofi lenei. O tagata e faamoemoe e ave le latou fesoasoani e ala mai i tupe o lo o maua i se taaloga, e le o se faamoemoe e maua ai ni tupe a se isi po o se non profitable cause, atoa ai ma isi vaega o lo o i totonu uma o le Tulafono e faatagaina ai taaloga e talosaga mai i ai ni faalapotopotoga po o ni tagata taitoatasi.

E le gata foi i lea lau Afioga ua tatou vaai foi ua ofi mai i totonu ia isi ituaiga e pei o taaloga, talu ai ia le alualu i luma o tekonolosi lea ua tatou silasila ai i taaloga lea ua fai mai i luga o telefoni, e le vaega lea o le Digicel ma le Samoa Tel, o lo o aafia uma i lalo i i le puipuiga o na foi taaloga. O taaloga uma e fai, e tatau lava ona i ai se auga tatau, authorize purpose, e faatagaina atu e le Matagaluega e fai ai taaloga faapea. O le mea lea e i ai nei, e pei e sau foi lea pei o se faalauiloa o se latou service ae tele le tupe lea o lo o alu ai i totonu e maua e nei kamupani.

13 NOVEMA 2017

**Tulafono Tau Faaofi o le Faafoga o Taaloga Eseease Tau Tupe 2017
- faitauga faalua**

O tupe la na, e tatau lava ona i ai se auga tatau e ala ai ona fai ia ituaiga taaloga faapena, o tupe la na e faaalu sao lava i le mea lea e fai mai e ave i ai. E i ai le faatagaina e le Matagaluega ia le mea e ala ai ona fai lea taaloga ma lea taaloga, ona mautinoa lea e alu sao i ai tupe e maua. E i ai foi le malosiaga o le Matagaluega, e o ai e suesue tusi a i latou nei, po o alu sao tupe nei na maua i le faamoemoe e pei ona talosagaina. O tatou bingo a aulotu, e pau lava le tulaga lea ua faamanino i lalo i i, o le Tulafono lea o le a faia pemitā o tulaga faapea. O le a le toe faia e le Ofisa o Leoleo, ona faamaioio lelei lea o i latou foi o lo o talosaga mai ma le Matagaluega le aso e fai ai lea taaloga, o fea le mea e fai ai, o a ia prizes o lo o faamoemoe, ma le tupe, po o fea e fia faaalu i ai le tupe, po o le faiga o se fale po o le falea po o le a lava. O tulaga uma na ia manino, e pei o tulaga na o lo o taumafai ai le Tulafono lenei, ia aua ne i i ai ni tulaga e faia se talosaga mo sea faamoemoe ae o ave tupe fai ai se isi mea. Ma aua ne i maua ai se tupe maua a se tagata e toatasi. Ia manino lava le auga na ala ai ona fai talosaga, mulimulitaia foi e le Matagaluega ina ia faatino lava le tulaga lena. Ua faaititia ai foi i lalo o le Tulafono fou lenei tausaga o tagata e le mafai ona toe fai ni taaloga tau tupe, lea ua faasaina i latou e i lalo ifo i le 21 tausaga ona toe taaalo i taaloga tau tupe. O lo o manino uma lava i totonu i i. O lo o i ai foi taaloga o lo o puipuia i lalo i inei e pei o le TAB o le taaloga tau solofanua, o le National Lotto, lulu, bingo, o sales promotions a nisi o faleoloa lea e faalogo i ai e pei e promote ai a latou oloa, a o lea la ua cover i lalo i i, ona e uunaia ai tagata e o e faatau a latou oloa, e faapea e faatau ni au oloa se lima ona maua fua lea o lau pepa e te alu ai i totonu o le lulu. O lea foi la e cover i totonu i i, ia manino lava e leai se uiga foi lea e pei e obligated ai le tagata lea e faatau le oloa. Ia ova atu lana tupe e faatau ia maua ai e ia se avanoa aua le se'i lea e faamoemoe i ai.

Lau Afioga atoa ai ma isi tulagā e pei ona i ai nei, o lea ua oo mai foi isi lotto ia ua tatou vaai ua fai mai i luga o le Televisē. O le a cover uma lava i lalo o le Tulafono lenei. E fai lelei pemitā ona avatu lea o le faatagaga e le Matagaluega po o le lē faatagaina foi, pe afai e aumai le tusi talosaga e le talafeagai le talosaga lea e aumai ma fuafuaga a le Matagaluega i lalo o le Tulafono lenei.

Lau Afioga atonu o le aotelega lena, ae atonu e maua foi nisi avanoa pe a tuu atu i le mamalu o le Komiti. O nisi manatu e faalautele ai lenei faamoemoe, ae o le auga lena lau Afioga o le fia puipui lava i o tatou tagatanuu aemaise foi ina ia aua ne i afaina ni soifua o nisi talu ai le faatupulaia o taaloga nei ua ulu mai i totonu o le tatou atunuu. Ma lou faaloalo lava lau Afioga.

FOFOGA FETALAI: Ma lo faafetai. Ia se i tulai mai lau Afioga i le sui usufono mo Faasaleleaga Nu.1 Sisifo.

13 NOVEMA 2017

**Tulafono Tau Faaofi o le Faafoga o Taaloga Eeseese Tau Tupe 2017
- faitauga faalua**

Afioga Hon GATOLOAIFAANA AMATAGA ALESANA GIDLOW (Faasaleleaga Nu.1 Sisifo): Faafetai tele lau Afioga i le Fofoga Fetalai mo lou avanoa. E muamua foi ona ou momoli atu le agaga faafetai i le Afioga i le Minisita mo lenei Tulafono Tau Faaofi matagofie, o se Tulafono Tau Faaofi taua, o se Tulafono Tau Faaofi foi ua leva ona moomoo i ai ina ia – e pei ona e saunoa e mataituina ai tulaga tau gambling po o le faaogaina o seleni mo taaloga eeseese tau tupe. O vaega uma o le Tulafono Tau Faaofi e matuai matagofie le faataatiaga mai aemaise le tulaga lea ina ia mataitu tagata e tatau ona ave i ai pemitā ma ituaiga taaloga tau tupe e tatau ona faataga ma taaloga e le tatau ona faataga.

Na pau lava lea lau Afioga i le Minisita e fia tuuina atu se lagona ia ma e fia avatu foi se fesili i le tulaga lea i le control ina o e i lalo ifo o le 21 tausaga mai le faatinoina o nei taaloga. O le mea muamua lau Afioga e pei ona lausilafia e le Maota nei aemaise foi o le faafogafoga mai a le tatou atunuu, o taaloga ia i telefoni e leai se puipuiga o tagata e taaalo ai. Ae ou te lagona o le toatele o le au taaalo o e i lalo ifo o le 21 tausaga e leai se control. A o le faaaluina o le seleni e le o se mea foi e ao ona tatou le mataituina aua e tulai mai ai isi tulaga e aafia ai lava tagata lava ia i lalo ifo o le 21 i le mea e maua mai ai lea seleni, po o talafeagai le auala e maua mai ai. Ae pei o faaososoga ia e tatau ona tatou vaavaai i ai ina ia taofiofia ai le mafai ma le faafaigofieina ona latou taaalo i taaloga faapea. E le gata i lea, o le tulaga lea i le TV Bingo o se taaloga fou foi ia Samoa, ioe, ua faafaigofie ona taaalo ai foi fanau i totonu lava o le lotofale o aiga. Ia e moni o lo o tagai i ai le tama ma le tina ae o le agaga lea e aumai e le Tulafono Tau Faaofi e taofiofia ai le sese o se culture po o se olaga o le a tuputupu ae ma a tatou fanau o le a faigofie ona fiafia i taaloga faapea.

O le mea lea ou te tatalo atu ai ma ou faafesiligia ai foi lau Afioga i le Minisita, po o a ni aiaiga a o a foi ni puipuiga e mafai ai ona taofia fanau ma faasaoina ai latou ae le i oo i le taimi e mafai ai ona latou faia ni faaiuga talafeagai ma ni faaiuga lelei i le faaaluina o le latou tamaoiga po o le lē tagofia foi o le tamaoiga o tama ma tina aua lava le faamalieina o le loto i le fia auai i taaloga faapenei, ae pe o talafeagai pe leai. O se popolega lena lau Afioga i le Minisita, po o a ni aiaiga o lea ua saunoa o le a taofiofia, e i ai le tulafono e le mafai ona taaalo i latou i lalo ifo o le 21, a o taaloga ia o lo o mafai ona faatino. Pe i ai la ni auala e taofia ai, pe o le matuai taofi loa o ia ituaiga taaloga ina ia aua nei mafai ona aafia ai a tatou fanau. O le faalatalata atu lea ma le ava ma le faaloalo. Faafetai i lau Afioga i le Fofoga Fetalai.

Ia, se i tulai mai le sui usufono mo Nuū Tu Taulaga i Sisifo.

Afioga FAUMUINA ASI PAULI WAYNE FONG: Faafetai atu lava i lau Afioga mo le avanoa ua mafai ona tuuina mai i lenei aso. Ua afifio foi lau Afioga ma le Palemia ma lena Itu, ia ua afifio foi lenei Itu ma ona Taitai ma lenei Itu. Ae ao foi ona fia faaleo se agaga vaivai i le tulaga i le Tulafono Tau Faaofi lea ua i ai. E faafetai atu foi i lau Afioga i le Minisita i lou taumafai mai i le faamalamalamaina o le Tulafono Tau Faaofi.

13 NOVEMA 2017

**Tulafono Tau Faaofi o le Faafoga o Taaloga Eeseese Tau Tupe 2017
- faitauga faalua**

A o le popolega o lenei sui usufono, ona tagai foi lau Afioga i le Fofoga Fetalai, o le tele o isi Ekalesia ma le tele o isi Faalapotopotoga o lo o faamoemoe i taaloga nei aua foi le faatamaoigaina o le Ekalesia aemaise foi o Faalapotopotoga i mea e tulai mai. Ae ao ona avatu se tuualalo i lau Afioga i le Minisita pe mafai ona tilotilo i le tulaga o tupe maua. A faapea o vaavaai se taumafaiga i se tupe maua e sili atu i lo le mea lea e manaomia e Ekalesia, e leai la se mea o le a aafia ai faalapotopotoga laiti aua e le faapea e maua ai ni a latou tai \$10,000.00 i se po pe a faapea e fai le taaloga lau Afioga i le Fofoga Fetalai. A tele lava se tupe e maua, ia e laki ae oo i se \$1,000.00, a o lea la o le a fai le laisene e taofi ai i latou o lo o naunau e fai pea ina ia maua ai lea fesoasoani. Ia tagai foi lau Afioga, e leai o tatou lava sa faatagaina le Tulafono lea o taaloga tau tupe ina ua tatou faia le laisene e mafai ai ona faatagaina i Samoa nei. O lea la ua manaia le tulaga lena ua i ai aua o lena ua i ai ma ona puipuga. Ae lau Afioga i le Fofoga Fetalai, o lea la o le a puipui atu ai ma le lautele o Samoa atoa o lo o faamoemoe i vaega ia. Ae i ai foi le talitonuga o lou sui usufono o lo o i ai foi le aoga o taaloga nei i le mamalu o le atunuu. O lea foi e alaala mai le Afioga i le Minisita o Tupe Maua.

FOFOGA FETALAI: E faamalulu atu i le sui usufono o lo o saunoa, talu ai ona o lea ua tatou toai taunuu i le tatou taimi manava, e ao ona faatu le lafo e tusa ai o ala o mea ina ia faapena ona toe faaopopo, ia o le manumanu lava i lau saunoaga. Ae faapuupuu mai pe a maea le lafo.

Ou te tapa lau Afioga i le Palemia mo se lafo.

LAFO MO LE TOE FAAAUAUINA O ITULA FONO

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga e i ai le agaga e le o toe umi le tatou Fonotaga, o le mea lea e i ai a lou taofi e mafai ona tatou tagofia ma le isi tamai Tulafono lea e sosoo atu ona tatou malolo ai lea. O le ala lea ou te tulai atu ai e faatu le lafo, *Ina ia faaauau Tulafono Tau Faaofi seia maea le faitauga faalua o le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017.*

Faaluaia e le Minisita mo Pisinisi, Alamanuia ma Leipa ma le Minisita o Tupe.

Na faamaonia le lafo.

FOFOGA FETALAI: Tulai mai le sui usufono mo Nuu Tu Taulaga i Sisifo, atonu e le o toe umi foi sou finagalo.

13 NOVEMA 2017

**Tulafono Tau Faaofi o le Faafoega o Taaloga Esecese Tau Tupe 2017
- faitauga faalua**

Afioga FAUMUINA ASI PAULI WAYNE FONG: Ia o le agaga lava lea lau Afioga i le Fofoga Fetalai ina ia toe tagai le Tulafono Tau Faaofi e iloilo le aofaiga o le tupe maua ina ia mafai ai ona faalaiseneina i latou o lo o tetele seleni e maua mai ai ae faasafua pea le mamalu o isi Faalapotopotoga aemaise foi Ekalesia ma Aulotu o lo o faamoemoe i le faamoemoe lenei. Ia aoga foi le sugatupe lenei mo nisi foi ma le mamalu o Faalapotopotoga i tua. Ia na pau lea o se manatu lau Afioga i le Fofoga Fetalai, ia manuia lava le Fono i lenei aso. Faafetai.

FOFOGA FETALAI: Malo faafetai. Toe o le sui usufono mo Vaimauga Sasae lea e fia saunoa. Tulai mai le sui usufono mo Vaimauga Sasae ona faaiu mai lea e le sui usufono mo Falealili. Toe toalua lava sui usufono faamolemole. E lelei lava ona faapupuu mai leaga o lea ua tea le tatou taimi manava.

Afioga SULAMANAIA FETAIAI TAUILILI TUIVASA (Vaimauga Sasae): Faafetai o le a faapupuu atu. Ia faafetai i lau Afioga i le Fofoga Fetalai aemaise foi le paia o lenei Maota. E faatalofa atu foi i lenei itula lenei Itumalo i le Afioga i le Taitai, le Afioga i le Palemia, e tusa ai foi ma le toe talii ma ii le atunuu, ia viia le Atua ua toe faafoisia ma ua toe faaopopo le soifua laulelei i lau Afioga.

E faapena foi ona faatalofa atu i le paia o lenei Maota i lenei taeao, ae fia fai se manatu ona o le taua o le mataupu ua opea nei i le Maota. Faafetai i le Afioga i le Minisita aemaise foi le Pulega faapea le Ofisa Sili o Pulega ua aumai se Tulafono Tau Faaofi faapenei aua foi le puipuiga o si o tatou atunuu aemaise foi o tupe maua. E moni a i tulaga uma ia a o le tupe lava le mea taua.

O isi la taaloga uma o le a le oo iai sou manatu, a o le tulaga lea i le bingo e pei o lea ua matau atu ma e faafetai lava o lea e malamalama le sui usufono o lo o tuu pea le avanoa mo nai Ekalesia ona e pei o se taaloga lea o lo o tua i ai nai a tatou Ekalesia i mea e fai. O lea foi ua maua atu le tulaga lea ua tuuina mai ina ia resitala i le tou Matagaluega, e pau a lena o le popolega o le sui usufono ona o lea foi e maitauina o bingo a Ekalesia lea e fai foi laisene i le Matagaluega o Tupe Maua, ae tautuana se tulaga foi lea i se fee e faalaitiiti ifo mo nai Ekalesia.

O le isi tulaga e fia avatu ai se manatu o le tulaga i bingo, sa tatou inaina lava i le tulaga lea i casino i alo ma fanau, ae a tatou vaai la i le bingo fou lea ua i ai se i tulou foi le paia o lea foi kamupani lea ua faasau i luga o le TV le latou bingo. E pei o popolega na o lou sui usufono e pei ona saunoa foi le isi sui usufono ona o tatou lea ua faaoga le TV ma Leitio e faasau ai nei faasalalauga. O nisi o Ekalesia e faasa le tulaga lea o le taaalo i bingo, ia a o lea ua maua o lea ua taaalo ai nisi o Ekalesia nei e taaalo nana ai lava i totonu o fale i le vaaiga a Ekalesia ia a o la e silasila mai lava le Atua ua solitulafono.

13 NOVEMA 2017

**Tulafono Tau Faaofi o le Faafoga o Taaloga Esee Tau Tupe 2017
- faitauga faalua**

Ua tago le loomatua pasi atu i le tamaititi se i omiomi ifo ae le o iloa mai lava e le Ekalesia. O tulaga faapena. E pei o le popolega lea e i ai pe le mafai e lau Afioga i le Minisita ona soloia nei alaleo e faasalalau ai tulaga ia ona o le popolega o lou sui usufono i le tulaga lea, ona o le aveatu i luga o alaleo a le atunuu. O lea foi e maua i lau tulafono lea na aumai i le 21 tausaga, e pei a ona ou faiatu e lelei a le Casino aua foi e le o mafai ona o i ai. A o lea la ua sau nei le taaloga lea i maota ma laoa ia e pei o le popolega lena o lou nei sui. O la ua iai lava hall ma maota ma laoa e agai i ai Ekalesia ma i latou e taalo ai, a o le faasau lea i luga o alaleo ia e tatalo atu pe mafai ona taofia lea tulaga.

O le isi tulaga e lagolagoina ai le Tulafono Tau Faaofi, ona o le tulaga i mea ia o telefoni i kamupani fai telefoni, ta te faalogo atu o faapea mai e text le 444 e te agavaa ai, ia se i silasila ane i nei vaega. Ua faavalea ai lava le atunuu ae uma ifo toeitiiti fia selau afe tupe e maua ai ae na o le tasi le taavale. Pe mafai ona silasila ane i ai sei maua ai. E tatalo atu foi i le Minisita o Tupe Maua se i fesoasoani atu i lea vaega i le faaogaina o si o tatou atunuu. O le isi ia ua naunau a e faatau mai le credit e faaogaina e vili ai fanau ae se i maua ai le text lea.

O le isi vaega o le vaega lea o Car Dealers pei o lea e maua e tele a foi ina faatino a latou auaunaga ae fai ai nai Lulu, ia lelei ua maua ai nai vaega ia. Ae o le toe avatu o lau talosaga ona o le tele o mea e resitala ai vaega ia o bingo a Ekalesia pe le mafai ona tuutuu i lalo, pe na o le o atu a e resitala i lau Matagaluega ae leai ni tupe e totogi ona o lea foi e totogi tupe i le Matagaluega o Tupe Maua.

O le isi tulaga lea ua maua o lea ua aveese le power lea sa i le Matagaluega a Leoleo, e pei o le tulaga lea sa naunau ai lava ma lagolagoina le i ai pea i leoleo ona o alii malu o le Malo e o atu e vaai taaloga ia i afioaga e fai ai. A o lea la o le a soloia le Tulafono lea e aumai ai le pemitā mai le Matagaluega o Leoleo ae le o outou o ni Leoleo. O le tulaga na i ai sa ave le mea i leoleo e faatatau a mu le fale ia ona o atu lea o le Fuimu ma Leoleo e vaai, ia pe fai foi se misa, a o outou na o le vaaiga o tupe ma o lea foi e maua e fai le tou siaki (audit) o tupe maua, ia ae pei o le naunautaiga lava lena o le Matagaluega o Leoleo. A fai ni taaloga e malupuipua taaloga aua la e i ai malu o le Malo.

Ia pau lena o nai Vaega, a o le tulaga i taaloga uma, e lagolagoina e lenei foi Itumalo, ae o bingo lava a Ekalesia, o le ala lena o lou tatalo atu ina ia aua nei i ai ni tatou tupe e totogi mo le resitala i le tou Matagaluega. Ia manuia le Fono.

FOFOGA FETALAI: Faafetai, tulai mai le sui usufono mo Falealili Sisifo. O le saunoaga mulimuli lea i lenei mataupu.

Tofa AUMUA ISAIA LAMEKO (Falealili Sisifo): Faafetai mo le avanoa. E momoli atu le agaga faafetai i lau Afioga i le Fofoga Fetalai mo lenei avanoa taua.

13 NOVEMA 2017

**Tulafono Tau Faaofi o le Faafoga o Taaloga Eseese Tau Tupe 2017
- faitauga faalua**

E momoli foi le faafetai tele i le Afioga i le Minisita e ana le Tulafono ua aumai i lumamea pei ua fai foi si leva o i ai le tatou Tulafono tuai lea. O lou la sui usufono ma le Itumalo o Falealili Sisifo e lagolagoina tele le Tulafono, ae i ai nai vaega e tatau ona toe tagatagai i ai, o le Vaega lea e 55 pei o lea o le a faatapulaa ai bingo foi nei e fai e tagata taitoatasi.

Ma le isi vaega, ou te talosagaina faamolemole pe le mafai ona i ai se vaega o le Tulafono Tau Faaofi e fai ai le faasalalaua foi lea faalauaitele lea pei ona fai i tulaga o atinae a le Malo lea o lo o i ai, a fia fai sau atinae ona faasalalau lea i lalo o le LTA, o le galuega lea o le a faatino. O le lelei o le itu lea, e iloa ai e le toatele o tagata le tele o taaloga ia o lo o fai, e le gata i le bingo, o le tatou lulu, o le vaega lea i le faasalalaua tatou promotions o materials mai le tele o falefaigaluega. Ae le gata i lea, o tatou kamupani telefoni o lo o faia a latou taaloga. I lou lava talitonuga o lou sui usufono, o le filifiliga lava a le tagata ia po o fea le itu e taalo ai e maua ai le tulaga o le faasiliga o le seleni o lo o faaluina ai. Na pau lava le itu lea na maua i nisi o faamatalaga, o le tulaga lea i le taaalo o i latou i lalo mai o le 21 tausaga. O le matafaioi lava lea a matua, e le gata i tagata matutua, a o le faatatau i le taaalo o tamaiti.

Na pau lea o se motugaafa, ae faapea foi ona faamauiina le faafetai i le lagolago a si ou itumalo i le paia ia Alaalagafa ma le lua Nofo a Tulafale ma le Tauagaeseese ia Falealili i lo ma vaa seelua ma le Afioga i le Gafatasi aua upufai o le tatou Malo. Faafetai.

FOFOGA FETALAI: Malo. E faamalie atu i le sui usufono mo Faleata Sisifo e pei ona tulai mai, ua uma ona fai lata faaiuga.

Tofa LEALAILEPULE RIMONI AIAFI: Na o le tasi lava le minute lau Afioga faamolemole. Na o si vaega lava lea. Faafetai i lau Afioga. O le a le faia lau lauga afa itula lea na aumai e fai ona e taua tele le Tulafono Tau Faaofi lau Afioga. Aua o le mea lea ua tupu ia tatou, na tatou ola mai lava i se olaga tau gambling, ola mai loa le tamaitiiti ao ma lana gamble. Tuaia ia lea vaega a o le vaega lea ou te fia talanoa ai lau Afioga, o le Vaega 43 lea o le Tulafono Tau Faaofi, lea e faapea mai, polokalame faalauiloa i le faatauina o oloa ma auunaga, ae pei o le a tala tele i tua lau Afioga. Afai e oo i le vaega lea, e tatau ona tilotilo lau Afioga i le Minisita ma le tatou... e tatau ona i ai se exemption, e tatau ona i ai ni vaega e faataga i mea tau faleoloa ma faleoloa wholesale ma retail ma mea o hardware. O mea na e fai le latou competition ae penefiti ai tatou ina ia aua ne i i ai se papuipuia. A o mea ia o taaloga ia i telefoni ma mea tau gambling, tau suetupe i taaloga, o le mea lena i lou talitonuga lau Afioga, e tatau ona aiaia ma tagai i ai. A o mea ia o lea e manuia ai le atunuu e i ai tatou ia e le gamble lea e o i le faleoloa lea ua pau i lalo le tau o le meaai ma mea e faatau mai, ma le promotion o mea ia, e tatau la ona faaavanoa i lalo o le Tulafono aua le tagofia i lou lea talitonuga lau Afioga.

13 NOVEMA 2017

**Tulafono Tau Faaofi o le Faafoga o Taaloga Eseeese Tau Tupe 2017
- faitauga faalua**

O lea ua manino mai lava le Tulafono Tau Faaofi, seiloga lava e i ai se mafuaaga tatau e fai ai ona faatoa ave lea o se laisene i se tagata e fai ai sana taaloga, aemaise lava i mea o bingo ma mea faapena. Aua o le mea lea ua tatou vevesi ai nei, ona o le tatou le malamalama lelei po o fea le mea e tau o le bingo suetupe a o fea le mea o le bingo po o se suegatupe e ave mo se mafuaaga tatau. O lea la ua manino mai i le Tulafono Tau Faaofi, e momoli atu le faafetai i le Afioga i le Minisita ma le tatou Matagaluega, aua o lona uiga, afai la ae fai le bingo lea ua i ai nei lea ua suetupe, lona uiga la pe na o se latou management fee e totogi. Ae o lona uiga o tupe uma e maua e alu uma lava i charity organisations foi nei po o mea e moomia ai le fesoasoani pei o taaloga ma tulaga eseeese faapena.

Na pau lena o se manatu lea e faamamafa lau Afioga, o le Vaega 43 o le Tulafono Tau Faaofi, mo mea ia o auaunaga o promotion ma sales mo le faatauga o oloa ma auaunaga, lau Afioga i le Minisita, toe tagai i le vaega lea o le Tulafono Tau Faaofi ona e taua tele e aoga mo tagata lautele le feafaatauaiga lea i oloa ma vaega lautele. Faafetai lava.

FOFOGA FETALAI: Malo faafetai. Saunoa ia lau Afioga i le Minisita po o a nisi o mea e fia faamalamalama ona tuuina atu ai lea o le fesili.

Afioga Hon LAUTAFI FIO SELAFI PURCELL: Faafetai i lau Afioga i le Fofoga Fetalai, faafetai foi i sui usufono sa faaalua o latou manatu. E pei ona fai atu, o lo o tele lava le avanoa e toe silasila i ai pe a tuu atu i tua i le Komiti le tatou Tulafono Tau Faaofi. Ae manaia manatu ua faaalua i lenei aso. O tulaga e pei ona auiliili mai, o le a silasila totoa i ai le Matagaluega pe toe tapue ai le tatou Tulafono Tau Faaofi.

O isi manatu ia sa aumai, o lo o i totonu lava o le tatou Tulafono Tau Faaofi, atonu e toe faitau auiliili i ai, e le o i ai ni faasaaga faapea e faasa ona fai ni bingo, ae ia fai le laisene. Manaia le manatu faapea o bingo foi nei a aulotu ma tulaga faapena ia tuutuu i lalo le fee, o mea na e silasila i ai le Matagaluega i le taimi e faatino ai le faamoemoe po o a fees e tatau. O lea e iloa o tatou bingo ia o lo o ola ai tatou aulotu, a o lo o tele foi isi ituaiga suegatupe lea e le o alu sao i le taimi lenei i ni mafuaaga tatau, lena o lo o taumafai tatou e puipui. O mea nei o sales promotion, o le naunautaiga ia puipui latou o lo o i totonu o le promotion ia aua ne i aafia aia a latou tagata faatau ona o ni faiga faatosina a Matagaluega po o latou nei fai oloa. A o **manatu uma ua faaalua i lenei aso lau Afioga, o le a toe silasila totoa i ai le** tatou Matagaluega ma toe tapue ai le tatou Tulafono Tau Faaofi i le agai i luma. Lau Afioga, ma lou faaloalo tele.

Na faamaonia le lafo ma faitauina le Tulafono Tau Faaofi o le Faafoga o Taaloga Eseeese Tau Tupe 2017 i lona faitauga faalua.

13 NOVEMA 2017

Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 – faitauga faalua

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloiloina ma toe lipoti mai i le Fono Aoa o le maea ai o le 90 aso talu ona tuuina atu le Tulafono Tau Faaofi.

TULAFONO TAU FAAOFI O TEUTEUGA O LE TULAFONO O LAFOGA O TUPE MAUA (NU.2) 2017 – faitauga faalua

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 i lona faitauga faalua ma ou te fia tautala faamalamalama i ai.*

Faaluaina e le Minisita mo Tupe, Minisita mo Tina ma Tamaitai, Atinae o Nuu, Afioga ma Agafesootai ma le Minisita mo Aoga, Taaloga ma Aganuu.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, o le Tulafono Tau Faaofi e puupuu lava. O le sini autu o le Tulafono Tau Faaofi lea o le toe tuu lea i tua o le aso e muta ai le aoga o le fuafuaga o tupe e totogi atu o lafoga mai le aso 30 Iuni lea na pasia ai i le aso 1 o Tesema. Na pau lava lea o le auga o le Tulafono Tau Faaofi lau Afioga.

FOFOGA FETALAI: Malo faafetai. Ia se i tulai mai le sui usufono mo Alataua Sisifo e saunua i le Tulafono Tau Faaofi.

Afioga ALIIMALEMANU ALOFA TUUAU: Faafetai i lau Afioga i le Fofoga Fetalai mo le avanoa. E puupuu lava se manatu, ma o le fesili i le Afioga i le Minisita i le Tulafono Tau Faaofi o Teuteuga o le Tulafono o Lafoga o Tupe Maua ona o lea e maitau atu o le tupe totogi o lafoga lea sa faagata i le aso 30 Iuni 2017, ma ua maea le tatou Tala o le Tupe po o le Budget 2016/2017. O lea ua tatou i ai i le tausaga faaletupe 2017/2018.

O le fesili la; o le a le aafiaga o le Tala Faatatau o le Tupe po o le Budget lea e i ai o le tausaga faaletupe leni i le Tulafono lea ua i ai nei? Aua o lea e maitau atu ailogaga i ai se tatou Supplementary, o le a le aafiaga ae faapefea foi la ona toe fesootai le aafiaga lea o le a i ai nei le Tulafono Tau Faaofi lea? Faafetai.

FOFOGA FETALAI: Malo. Tulai mai le Afioga i le Minisita mo Tupe Maua i sina ou finagalo e tau faamalamalama ai lea itu.

Afioga Hon TIALAVEA FEA LENIU TIONISIO HUNT: Faafetai lava i lau Afioga, o le Minisita mo Tupe maua lau Afioga. Faafetai mo le faafesili.

13 NOVEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 – faitauga faalua**

O le tulaga i le tax credit lea, e leai se tupe a le Budget a tatou e aafia ai. O tupe ia o tupe a kamupani foi nei e invest mai i hotels ona faaaoga ai lea pe a aumai latou tala o tupe i le tausaga. A i ai ni latou tupe e totogi i le Ofisa o Lafoga, e faagaioi ai latou tupe ia e aveese mai latou tupe ia, ae leai se aafiaga i totonu o le Budget, o latou tupe maua. Na pau lava le aafiaga o le Ofisa o Lafoga o le le toe maua ai o lafoga i le lumanai ona i le faaaogaina o le tax credit lea, ou te le iloa po o ai na faia le Tulafono Tau Faaofi, ae ou te talitonu o se Tulafono Tau Faaofi ua tatau ona sui. Taumafai e sui le Tulafono lea e le toe faatinoa. Na faagata ia Iuni ona toe apalai mai ni hotels fou i totonu o le scheme lea, vagana ai tagata e mafai pea ona invest i totonu o hotel ua uma ona pasia e le Komiti lea o investment committee. O latou e pasiaina ona avatu lea i le matou Matagaluega resitala ai le hotel lea ua mafai ona invest atu ai tagata. Na pau la lea o le mea na toe tuu mai ai i tua, o le invest e toe invest mai ai tagata ia, ona ua faafuasei ona tipi.

Na amata mai le scheme lea i le 2003, faafou i le 2008, toe faafou i le 2013. E tatau ona uma le faafouga lea tai lima tausaga i le 2018 ia Iuni, ae ua tulai mai foi ma talanoa ma le Minisita o Tupe, e fai lava sina faaletonu, tusa o lea e fau e le matou Matagaluega hotels ia e invest ai tagata nei, ona o tupe o lafoga sa tatau ona totogi mai, a o lea ua invest mai ai latou... o lea la ua sau le Tulafono Tau Faaofi, tipi motu ai i i e le toe faia i le aso muamua o Tesema. Ia o le faamalamalamaga lena lau Afioga.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai faamolemole pe maua se avanoa ona o le taua o le mataupu? Faafetai i le Afioga i le Minisita i le mataupu ua toe aumai i totonu o le Maota, ae i ai lou manatu o lenei sui usufono, sa lagolagoina lava le taimi lea na faauma ai loa le auunaga i mea ia o tax credit, ona o le tulaga lea sa i ai mo le silafia e le Maota, o lea lava e penefiti kamupani foi nei e o e ave tupe ia e invest i hotels, ona aveese ai lea... Mo se faataitaiga a faapea e ave se \$100,000 agai se hotel e se kamupani, e uma lava le tausaga lea o la e i ai lava le credit lea a le kamupani lea i luga i le Matagaluega o Tupe Maua ae leai se tupe o ave i ai, o la e o invest agai i hotels. Ou te matua lagolagoina lava la le tulai mai a lenei Minisita mataala ma le Minisita o Tupe e aveese ai lea mea, ona o la e o invest i hotels ae o la e credit ai latou aitalafu po o... i luga o le Matagaluega o Tupe Maua. O lou popolega la ua ou fiafia ua faagata i le aso lea 30 Iuni, a o lea ua ou toe vaai atu po o le a le mafuaaga ua **toe extend ai i le aso 31 o Tesema, ae ua tatau ona taofia e aua ne i toe o nisi** e fai lea faiga. O lou agaga la lea sa i ai ou te le lagolagoina ai le toe tuu i tua, a ua taofia loa tuu loa, aua ne i toe o nisi e invest mai nisi kamupani ae credit ai latou aitalafu pe aveese mai le Matagaluega o Tupe Maua.

E pei la o lou lena agaga lea e avatu ou te matua lagolagoina, aua o lea ua faauma i le aso 30 lea na i ai o Iuni, a o lea ua toe tatolo mai le Minisita, o lona uiga o lea lava e manao le Minisita e i ai nisi ana tagata lea e le i uma i totonu e toe o e invest i le vaega lea e aveese mai luga o le Matagaluega.

13 NOVEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 – faitauga faalua**

O lou le lagolagoina lena i le taimi lea na i ai, ia ua uma ai foi. Ma lou faaaloalo lava. Faafetai.

FOFOGA FETALAI: Malo. Ia, se i toe tulai mai le Minisita mo Tupe Maua.

Afioga Hon TIALAVEA FEA LENIU TIONISIO HUNT: Faafetai i le sui usufono sa i le Matagaluega o Tupe Maua i le taimi sa pasia ai le Tulafono Tau Faaofi lea ae le i maua ia.

Lau Afioga i le Fofoga Fetalai, e sao le sui usufono. O le tulaga na toe tatala mai ai i tua ona o le talosaga a le Chamber ma hotels ia na faafuasei ona tipi pe motusia faafuasei ia luni le scheme lea, ona talosaga mai lea o le Chamber pe mafai ona tuu mai i tua i le aso 1 o Tesema. O lea la ua tuu mai ai i tua, a oo mai loa le aso lea ona taofia ai loa lea ma faauma ai loa ma faagata ai lea ituaiga scheme e le toe faia. A o le agaga tonu lena na tuu mai ai i tua ona e i ai hotels na faafuasei ona talosaga mai ua latou tetei ua alu atu le faasalalauga o le a faamuta ia luni, a o le faasalalauga lea na faia lava i le amata o luni. Ia e pei la o le agaga lena o le toe tuu o le avanoa i le Chamber i le latou talosaga, ona o le matou foi lagona e fair le latou talosaga ona ua faafuasei ona tipi... ae le faapea na gata ai i ni hotels fou e toe apply mai i le scheme vagana lava hotels ia ua uma ona approve e le investment board ma approve e le Kapeneta ma approve foi e le CEO o le matou Matagaluega.

E pei o le faamalamalamaga lea.

FOFOGA FETALAI: Malo faafetai.

Afioga SULAMANAIA FETAIAI TAUILIILI TUIVASA: Lau Afioga i le Fofoga Fetalai ou te le faatautee i le saunoaga a le Afioga i le Minisita, ae pei e i ai lava nai lave na i le saunoaga a le Minisita fai mai e le i maua. Sa e silasila lelei i records a le tamaloa o lo o i luga i le Matagaluega o lo o matatia ai le tulaga lea, ae pei e le logo malie ni ana saunoaga ia i iu o ana saunoaga. Ae pei o le agaga lea o lou popole, o lea ua saunoa le Minisita mo e ua uma ona resitala, ae faapefea la e fou lea o lo o fia i ai i totonu, aua o lea ua tatala le avanoa. Afai la ua tatala i le aso 31 o Tesema e tuu atu i ai, tuuavanoa loa i isi foi o la e fia o e maua ai le penefiti lea. E pei o lou agaga lena o lou fai atu e matua lagolagoina le taimi lava lea na faamuta ai ae le toe tatalaina i tua, aua o lea e saunoa, o la e tuusaunoa ma tatala le avanoa i e ua uma ona resitala, a o la e fou o lea e faalogo o le a uma le mea lea.

O lou popolega lena ma lou faaaloalo lava.

FOFOGA FETALAI: Se i tulai mai le Palemia.

13 NOVEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 – faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le ituaiga mafaufauga lena ia i tatou foi lele e le o silafia le mea moni lea e tupu. E oo lava ia i latou o lea na ave i ai le fesoasoani, e oo mai nei lava, ua fia tausaga o la e faatali le latou hotel e le i faia lava. E le mafai la ona tupu se mea faapena o le o atu faatopetope nei ma fai ona tupu se mea i le va o le taimi lenei ma le aso lea o le a tapuni ai. O le tele ia o mea e tupu faapea, e laga atu ia pisinisi e talosaga i le fesoasoani ia a le Malo, na ona maua lava, e te fiu e faatalitali. Ae i ai isi pisinisi i le taimi lenei ua sulu i le Minisita, ae vaai atu lava o le a pasi lava le Tulafono sulu mai loa ia te au. E pau lava lau tali la e ave i ai, 'ai laia o le tou faiaga,' ae le i fai atu ae ua leva ona, ana faapea e fai uma hotels faapenei ua tele tatou hotels, manu e le popole foi tatou i le tulaga lea na i ai e tau o e aumai le Cruiseship foi lele, e tali ai le toatele o tatou malo ia na omai i le fonotaga, le fonotaga lea na fai a le Malo Afaatasi i inei.

O le taimi nei la, o le matua tele o tagata ia ua talosaga mai, e fai ia latou bookings i hotels. O le ala foi lena, o lea e lototele ai le tatou Malo e fai le tatou vaalele. O taimi uma lava ou te lele mai ai, e matua tumutumu le vaalele tele foi lea a Niu Sila o le 787 i tagata e omai, ou tu loa ma ou tiloitlo, e tele i papalagi. A toe foi foi la le vaa, e tumu foi vaa nei i isi foi papalagi sa omai e tafafao solo i inei i Samoa. Ou alu atu loa lava i le kamupani vaalele e kope le vaalele lea, a outou vaai atu loa e talafeagai ona toe aumai loa lea o se vaalele tele. O le mea moni ua tupu ia tagata e asiase mai ae o lea e faiaga isi, ona o le tulaga lena, o le e i ai foi ia latou taupega i faletupe, ae pei o lea e ala ona maua tupe ia o tupe sa tatau ona sau i totonu e faagaioi ai le Malo ae la e faiaga.

Lau Afioga i le Fofoga Fetalai, e leai se mea e sili ona vave ai le gaioi a le tagata e faatino i le faalogo mai ua tipi, ua lava lea taimi a leai lava. Na ou fai ai i le isi hotel, ua e iloa, se ua uma foi lou toe faamoemoe atu i se tou hotel ua tiga taliga, omai omai omai, fai le fesoasoani, na ona maua lava o le fesoasoani fiu foi e faatali. Ae ou alu atu i le taimi ou tilotilo atu i le location lea na faapea e fai ai le hotel, o la e vaoa mai e leai se mea.

Lau Afioga i le Fofoga Fetalai, o le lalolagi lea tatou te i ai, o le lalolagi e ola ai le saito ma le titania. E masalo e tele atu titania nai lo saito, o le mea la lea, e taua tele le Tulafono lenei lea ua toe faatu atu.

FOFOGA FETALAI: Malo, masalo ua maea ai i lea mataupu ma ua faapena foi ona oo i ai le faamalamalama a le Malo. Ma e faamalulu atu, aua foi le avea le naunau tele o tatou po o sui usufono mamalu ia po o Minisita foi e lagaia ai upu faapaia mata, e tusa o le maualuga o tatou o taitai o le atunuu, tatou fai fuafua foi ma fai mea faalogologo o la e tapuaia o tatou faiva e le atunuu.

Ia ae lelei ona tatou faaogaina pea le gagana tatou te maua ai le mamalu ma le tausafia, ina ia faapena ona sologa lelei ia le tatou galuega o tatou o taitai o le atunuu.

13 NOVEMA 2017

**Tulafono Tau Faaofi o Teuteuga o le Tulafono o Lafoga o Tupe Maua
(Nu.2) 2017 – faitauga faalua**

Na faamaonia le lafo ma faitauina le Tulafono Tau Faaofi o Teuteuga o le Tulafono o Lafoga o Tupe Maua (Nu.2) 2017 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono i le Komiti Tau Tamaoaiga mo le iloiloina ma toe lipoti mai i le Fono Aoa o lo o loma nei.

Ia ou te tapa ma le faaloalo lau Afioga i le Palemia, le Taitai o le Malo, ia mo se lafo e faaiu ai le tatou galuega.

LAFO MO LE TOLOPOINA

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te faatu le lafo, *Ina ia tolopoina nei Taulumaga o le Fono Aoa Faitulafono seia aulia le Aso Lua, 19 Tesema o le tausaga nei i le itula e 9:00 i le taeao.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

Na faamaonia le lafo.

FOFOGA FETALAI: Ia ae tatou te le i tolopo, e manatu e momoli atu le faamalo ma le agaga faafetai, tele ma anoanoai le tatou galuega ua mafai ona faatino i lenei aso.

Ia o le naunautaiga ina ia faapena ona talafeagai taimi ua faapena ona fuafuaina ma le tatou galuega ina ia mafai ona faataunuu ae le i aulia aso malolo o lenei tausaga.

Ia o le mea la lea e momoli atu ai le agaga faamalo ma le agaga faafetai, malo papale, malo foi le onosai. Ia e le faigofie faiva alofilima o le Palemene, ia ae tatou te faamoemoe i le Atua e fesoasoani mai e aumai lo outou finagalo ina ia tonu ma sao ia a tatou faaiuga fai e ala i Fono a le Palemene.

Ia ae tatou te le i tolopo, ou te tapa le sui usufono mo Falealili Sisifo, se tasi o sui usufono mo Falealili Sisifo e na te faaiuina ia le tatou Fonotaga i se tatalo.

Na tolopo Taulumaga a le Fono Aoa i le itula e 1:30 i le aoauli seia aulia le itula e 9:00 i le taeao o le Aso Lua, 19 Tesema 2017.